

萬載縣土著志卷二十九

藝文下

詩

四言

我我亭

有序

元學士

揭傒斯

富州人

殷仲堪答桓溫曰我與我周旋久寧作我宜春黃元瑜取以名其亭曰我我為賦詩一首

我遊於袁於龍之干有闢閑閑有環言言有構桓桓維集之

安我居我處我笑我語有翼其所而敢予侮我植孔嘉我構

孔華曾莫之迎而莫我多彼馳者子亦孔勞矣我既覲矣亦

莫我迷矣嗟殷氏之老猶弗桓是友我不我友將誰歸咎溫





溫其和瀏瀏其清藹藹其芳煥煥其明嗟維古之人尙或予  
聽采通志補

有竹五章章四句爲龍孔目駿賦

明六學士楊溥石首人

有竹猗猗維茂如簣君子樂之載歌淇澳 有竹猗猗中通

外直君子樂之四時一色 猗猗者竹挺挺其標不以春妍

不以寒凋 美矣君子翰林之英來遊來歌治世音聲 猗

歟治世千載重熙樂協簫韶鳳凰來儀

題王永誠綠筠清室圖

張璧

繁惟王丈人中之英蘭亭啓胄槐株植庭驅馳宦轍賢勞著  
聲解組賦歸勁節等盟創垂課子驚人一鳴慶挺玉樹綸閣

寵榮年逾尚父矍鑠稱評軍持紫芝煜煜騰馨徂徠松翠偃  
蹇參冥噫嘻斯圖也豈管琴書瀟灑披對於疎櫺殆衍龍鳳  
之奇種抑亦昌後裔之崢嶸

溥泉吟 有序

國朝 孫馨祖

余城居之西有溥泉迤城北注於蜀水東至南昌入湖漢  
夫達淵之泉固不同於在井之泉通志載此乃與井泉無  
別安知溥泉之濶借湖漢而入於海爲莫可涯涘哉余既  
飲而樂之號曰溥翁翁勞人也又將遠行未必能樂於是  
意未嘗不在是也作溥泉吟

澹澹溥泉注於蜀水風雲在望咫尺江海孰泳其淵自溥翁  
始 泉之溥翁居之下抱甕而汲餅齏有缶不驚波浪何勞  
車馬 醉翁壯年以翁爲戲霜髯不翁強顏老驥入少年場



飲酒易醉不如飲水適溥翁之味 短歌聲促長歌聲慢亦  
有心聲在聲之外寫水聽風可是天籟

五言古

衝雨萬載道中得逍遙觀遂託宿戲題 宋 黃庭堅 分寧舍人

逍遙近道邊憇息慰憊懣晴暉時晦明謔語諧讜論草萊荒

蒙籠室屋壅塵空僕僮侍偏側涇渭清濁渾 宋 山谷詩集

題李西傑水竹居 劉 章

在昔香山老水友而竹師心虛是師道性靜友亦宜孰謂物  
理妙乃為高賢資佳哉隴西子結屋溪之湄溪上亦何有有  
竹如在淇娟娟峙寒碧澄澄燭須眉微風一披拂維佩聲參

差俄頃萬籟寂粹然澹餘姿可但子師友我方師友之未到  
三歎息徒勞形夢思

前題 章 穎

水清湛無波竹直勁有節風味與誰隣夷齊采薇蕨羨君盧  
其間塵事俱掃絕無求萬慮空清夢化為蝶高垣繞華榭未  
免畏炎熱何如李君好宵襟澡冰雪玉山曾品題價重萬金  
將幽尋勝得趣靜對物理徹雖貧亦何傷政恐汚我潔吾言  
儻未然歸聽此君說

寄題張氏中隱堂 張孝祥

吾家中隱君才比萬斛泉短小精悍姿一劍當雄邊去年柳



州賊俯視衡嶽巔君從襄陽來孤忠作戈鋌談笑百雄安淨  
沈湖嶺煙謂當酬王勳金印如斗懸言歸遠如許此意誰為  
宣小隱即居山大隱即居塵夫君處其中政爾當留連早晚  
有詔書喚君遠朝天欲為中隱游更着三十年

以上三首采嘉定志補

題歐陽龍南朝所藏羅雉川秋江晚景

元揭傒斯

弱齡習村疇隨景慕追遊散策步隆阜揮袂陟高邱仰送微  
霄翮俯鏡清川流攀條賞韶穠折穎弄芳柔湘南擬詞賦江  
左狎吟鷗不識年歲邁詎貽軒冕羞一從黜仕版羣憂積  
樓朝隨車馬塵暮與形影儔雖荷明主知百志靡一酬懷祿  
已云忝抗迹豈末由流電三十載回腸幾萬周朱顏日去面

白髮日滿頭君子委纁素丹素含嶺秋寒蘆被枉渚橫靄澹  
長洲草樹一消落鳧雁各飛浮亂石夕流駛空郊朝景收庶  
類趨晏暮孤生增隱憂覽物因有觸流詠慨前修

宋贛州府志補

題東岐山房

虞集

秀挺東岐山雲氣常覆之林邱翳幽潛流泉發芳滋盤桓在  
中谷良疇漾清陂開堂直岡景長年誦書詩孝友夙所敦求  
道遠有師雅志尚端潔凡近諒難知康樂昔賜履詠歌足遐  
思啟書訪前聞往跡無所遺瞻彼古澗松深根連喬枝亭亭  
植高節鬱鬱含令姿眾木不同泯悠哉副深期

題蒙庵為黃石谷賦

虞集



東南有高邱下臨萬家邑汪洋挾春潤沃衍盛秋入羣山若浪波起伏翠重襲靈運好奇險高平罕相及幽人園綺間周覽度原隰隨山導清泉積石拾層級結庵以蒙名果行信所執良時一來游朔月九交十門當星斗高隴臥風雨濕一川燈火歸賓從雜車笠登高愧能賦騰身竦山立

為黃氏賦大雅詩

虞集

岐山鬱嵯峨鳴鳥昔有聞周公盛制作經綸以彌文朝事接燕饗勸勞兼賓軍肅雝述盛德工歌贊前勲流蕩桑濮靡何由返咸雲陳肆輒有見吳季真不羣公子有古絃歷然宮徵分大雅忽有作青春日方殷高堂以居之樂康永欣欣以上三首

采道園學古錄補

桐岡書屋

明曾棨永豐少詹

梧桐在高岡下有隱者居屋後山削玉屋前水鳴渠屋中何所有插架多古書竹簡識科斗芸香驅蠹魚豈伊惜寸陰庶用勤三餘名教有真樂孜孜遂忘劬及茲得賢嗣發軔登雲衢追陪青瑣賢出入承明廬聲光動鄉邑此屋信不虛黃金雖滿籛視斯諒弗如墨莊有遺訓永矣垂名譽

靜樂軒

鄒緝吉水庶子

雅志樂幽篁遠隔塵市喧屏居林壑間息心以忘言背水結茅屋面嶺開柴門羣峰當簷出修竹遮舍繁時事不相及外



物寧爲昏儻然一室內習靜臨前軒希夷絕塵想泯然謝覺  
煩至樂惟在茲擾擾焉足論

前題

王英

伯陽貴清靜莊叟樂恬熙寓心得所止達者斯爲宜遺隱在  
林麓逍遙復何爲軒窗極明豁草木皆芳菲適意聊泛覽忘  
情豈知疲眾紛諒已卻慮澹志自怡乃知靜者趣冥默真吾  
師安得謝輪鞅相與探元微

綠筠書室

易節

我愛西鄰交王君冬意氣植物慕佳卉營構擇幽地三徑色  
蔥蘢一室清陰蔽若人珊瑚姿虛心遺世累晚節固自堅桃

李終僮婢孰云林下風而無諸侯貴何當賦歸來與子同高  
致

高岡雅詠

楊宏備

藹藹君子廬乃在宜陽間門環康樂水圖畫五名山夫君懷  
隱德優游非等閒酌酒摘瓊枝仙人相與還五色散烟霞填  
刻成斑斕文章多令子鳴珮玉珊珊

山田大智寺古柏

并序

熊頤

清江

萬載之北鄙五十里有奇柏焉一本九幹大可蔽牛枝下  
垂仆而復起軒舉怒張怪異莫可名狀甲戌予客湖溪主  
李先生維則之廬詰旦主人具酒食邀諸友往視而寺僧  
適來相與取道江干徐步山椒林木陰崖擺風振雨忽聞  
泉聲清澈如鳴珮環至則方池半畝可鑒須眉柏於此托  
根焉夫山榛闕荅各止其所柏不山而水是生此殆天地



奇尤所鍾不可常理  
論者也因作詩以紀

晨熹動山牖剝啄聲頻叩羣友恣探奇相邀陟靈鷲行行俯  
澗濱灘聲喧石溜噴浪怒雪飛激響雷霆鬪已足駭心魂更  
復窮巖岫絕壁隱禪棲披雲參雪竇泉聲活活來古柏驚奇  
遘虬枝怪怒張虎攫紛馳驟兔起鶻復落矯矯勝葱峭一本  
幹九枝森然列長幼填倡和以箎風至號萬竅寒泉盤其根  
蒼蒼依井甃吁嗟造物奇耳目安可究昔予謁孔陵老檜傳  
曲阜萌蘖不徒生千古何能又嗣聞武侯祠結曲雙柏秀意  
謂宇宙間無復臻奇妙快哉此日遊眾言良不謬瀹茗出山  
僧園蔬雜釘餽坐久竟忘疲歸途已殘晝搦管速成詩慚余

先擊缶

舟中留別汪生映極

國朝 吳自肅

昌黎文起衰世俗皆為怪可憐太古音時人偏不解君才絕  
等倫揮毫獨瀟灑孫陽世所稀修翎嗟屢鍛我誠肉眼人亦  
嘗為君戒遇合自有期勸哉斯征邁

壬戌春自桐山旋里賦別辛生承頊并寄講堂諸子

吳自肅

薄遊憶當日遭時何太否舉動半違心面目全非已幸於戎  
馬間勉強栽桃李皮骨今尚存所慰猶在此辛子才獨絕奎  
聚執牛耳縱橫理學窟伐毛兼洗髓筆走跳天門賦貴洛陽



高車駟馬志  
卷二十一  
紙善是是亦足而不寧惟是軒冕視如塵肝腸更似水豈獨  
號文人真堪稱國士龍江舟上別屈指四年矣我來客龍眠  
鵝嶺人伊邇思之不能忘折簡勞尺鯉命駕賁然來歡予爲  
倒屣握手話當年旣悲復成喜開篋出新詩光芒氣成紫非  
直冠一軍佇看凌風起聯牀甫浹旬予復還梓里臨行再叮  
咛努力青雲裏同志紛多賢並借問諸子

陶家巖

辛聯昌  
邑舉人

曠蕩今古間高人不世出餘韻日卽微百代猶髣髴陶公祖  
徠客清名妙六逸平生一杯酒無心計得失晚歲慕康樂寄  
跡托巖穴高崖根青冥奧曠洞天豁嵌空俯深溪何殊仙人

室向來經遊眺高軒蔭清樾花明春未老好鳥相嚶戛白雲  
屯層岡孤月松際出徘徊仰餘照發興驚勝絕伊人去已遠  
碧草委霜雪如何掃地盡并此巖俱汨椎鑿雷奔崩剝落骨  
流血裕飭悲風來泉聲夜哽咽悠悠後來輩空尋昔賢蹟陰  
陽有代謝物理杳難必茲巖自興廢今古渾如一

南嶺

李榮陞

吾里環萬山地平不多畝高者無如何往往贅培塿南嶺如  
陶瓜分頭上下走又如構重垣睥睨當關守岐原與烟竹鼎  
列問誰手坐令同井墟秦越判媼友高低連兩巒天馬側身  
驟午日標松顛寒泉豎谷口駕言何所如搗水得耕耦遠色



增雨餘深光沐烟後飄蕭萬竿接陰壑埋春韭未知雲氣流  
翠罨破廬否茲山對吾居相狎遊亦偶蒼然圍屏橫歸徑屢  
側首

天湖山

李榮陞

迴嶂攀將窮一俯萬丈夔孤村鎖東南夾水峰遞應九頂穿  
雲秀源山躍相命旁羅陂陀間廬舍紛饒創荒臺隱霄漢鳳女  
臺誰薙松楸淨飄然騎鳳仙委化草常靚跪飲帝漿餘坐對  
天壺竟天壺泉磨挲蝕苔字未與玉雪稱黠僧習猿嬉宛轉欺  
天穿破慳身一賭餘崖不可遺捨身崖叢石挺雞冠雞冠尖雄聲  
半空磨陰竇潛虺蛇陽葩照梨杏東岡何迢迢氣象姿包孕

危步託飛鳥廢蹤憑過訶茲山亦不窄棚棚望相亘通力甚  
把犁質身渺懸磬以茲盤谷開何處寢邱剩勤生非可必况  
我力難競昫昫中阮田桐竹積旁磴非無水與日所憂草萊  
病崆岑豺虎場遺叟陳觴咏紆回愧先德里門闕造請山家  
愛霜腴焚歛爭時令歸路入暗烟火龍銜照贈

湖陂洞

辛頤邑歲貢

黃田山水窟一望特奇絕磊砢空中出平地罅石穴相傳一  
處好數里綿瓜賦採之得盡源湖陂聞聲咽李生好奇古爬  
羅素心切茅庵遠邀我去去洗煩渴經行不數武小口似微  
坼舉手披蒙茸俯窺聞瀨洩跼步入沈深側身隨轉折胸前



礙青苔背上挨石屑崖傾詎堪仰湍瀉仍淺揭貫魚穿地軸  
逼拶心慄冽湖陂那可聽少間愁火滅却不容身轉後進居  
前列漸遠清涼界始覺天氣熱嵌竇憊追隨頗嗔李生拙李  
生還笑我迤邐賴推挽聞者若相詢聊復將句綴

星光洞

辛頤

初如醯甕窄旋通天宇厥懸崖擁火看石漿滴形長流水不  
知處松濤瀉清響玲瓏轉來深心體增寒爽覽茲不盡興旁  
更開晃朗灣環心屢折探討恣幽賞沈冥迷晝夜相顧神思  
慌乍覺一星光別徑通來往欲出轉迴顧一境逾深廣欻石  
作鐘鳴微叩驚魍魎凜然始趨出潺湲漱石上水冽甘可嘗  
跌坐空塵想流連終未憚乘暇復來訪

萍鄉張明府粒民書郭孝子事見貽跋後却寄

魯鴻

污泥亦有蓮荒郊亦有麟誰言丐兒賤金玉貴其身康城有  
郭擦孝行芳千春乞食養母弟求仁而得仁王政先無告何  
况病且貧奈何令孝子不得奉晨昏靈藥天所貺至誠實感  
神富人病如擦踵門求一九卻金匪小節大懼辱其親富人  
亦人子廩擦如所生辭受依於禮母教信不愆古之庠序校  
皆以明人倫丐者行如擦可以充嘉賓願君廣物色無令失  
此人

采陳府志



遊雲峯洞

魯鴻

百里入雲峯山形如覆盎  
崒嶭豁天開俯瞰不計丈  
徑絕無鈎梯側身氣沮喪  
趾壓前人頂後來勢居上  
垂危爭杪忽入險得平曠  
偉哉造物奇狡獪千萬狀  
篆籀錯尊罍珠琲疊屏障  
石乳紛倒垂冰柱屹相向  
恍如閭闔開排列羽林仗  
又如禹鼎成神姦窮罔象  
想當混沌初融液氣酣暢  
磊砢鬱不平女媧力批亢  
雕鏤虛無根瑣屑事勾當  
娟妙難具詳茲遊荷靈貺  
傳聞洞源遠百折不流宕  
神物中屈蟠窟宅鎖紐壯  
世無然犀人詭怪勞想像  
列炬稍深入復覩高門伉  
進退分勇怯力疲覺神王  
投石驚雷霆天空裂層嶂  
目噴耳亦聾招魂幸無恙  
古來荒僻區靈異語或誕  
茲洞置城市遊展添幾兩  
秘惜自地靈智巧歸天匠  
薄暮下山歸空聆樵牧唱  
高吟懷謝公千載永相望

題龍江橋圖

辛從益

一水穿城來北流合西派  
雙江匯龍河豁然放清快  
東西崖竟絕渡險舟人戒  
長虹倏偃波劃若天所界  
巖巖鎮巨鼇何由騁水怪  
旣免呼航勞復勝徒杠隘  
諸鄉路交通爾我胸無芥  
誰歟建此橋橋成力已憊  
毀家利民涉吾宗德種邁  
初像今何存行人當下拜

橋西書屋昔祀建橋者像今屋爲劉氏有

我昔下筠洪輕舟發山脚  
洞鏡入江天鳴橈響幽壑  
仰視跨



虹人行空想複閣自別京華春返棹溯康樂津亭倏在望風  
景尚如昨崢嶸雁齒排橫江何秀削清川既夷曠雲樹煙艇  
泊洲平莎徑遙輿徒人繹絡惜哉崇文堰吼聲撼城郭梁石  
漸欹危誰為防崩落披圖發三歎利濟施真博食報在後人  
文章方遑躒

石庵

辛紹業

靈巖闕幽景石洞竊以深人言古寺好細路踏楸陰山氣無  
六月峭寒落衣襟長風倏震蕩白日晝蕭森乳泉時一滴長  
作雨餘音佛像塑奇古未令蝠糞侵老僧兩三人布衲穿遙  
岑渾渾泯知識麋鹿久同林一語及世事無言如聾暗頗疑  
羲皇代遺民遂至今欲從知不能低徊違寸心

龍龍山墓

辛紹業

寒鴉際空山獨樹冷無暉下有忠義骨感我心增悽憶昔明  
二葉攙槍掃紫微徵符來燕壘執詞矯且非戈矛起蕭牆辱  
王莫知歸長史排羣議屹立不可揮獨保危城小遙遙護帝  
畿神器移北藩蘊毒矢發機檻車日千輛焉問麟與豨維時  
方景輩錚錚犯嚴威齒抉猶能罵皮脫仍欲飛纒然環十族  
血染御街緋凜烈信莫干中道亦或稀長史外陪臣足未闖  
帝扉緘嘿豈不好要非心所希臣職既當爾臣死焉敢違從  
容成仁義嗟公其庶幾首邱今在此魂魄天孫依千載樹臣



高華縣志卷二十九  
十一  
節雪高霜澄澄

會仙塘

辛紹業

古墓浸寒水云是會仙藏會仙眼如月愛此水雲鄉天機杳  
莫測仙獨識微茫有質靡不化聖詰道其常安有千年骨朽  
壤闕愈光况復迂愚味餘蔭說休祥徘徊山之宅山川鬱以  
蒼雲日舒清景草木亦芬芳殷勤田間叟就我絮語長如聞  
百年前盜掘意匪良土衣杜侵毀實賴遺識彰太息下土頑  
茲理信難詳

同蕭大 招仙 登九龍山

辛紹業

蕭君好奇者招我登九龍初行密竹徑曲磴盤危峯翠氣生  
襟袖丹壁秀芙蓉冷露晝滴漉幽花間白紅決意逞先步險  
途踟後蹤翹首一天門雙卓鼓與鐘力盡不得上輕矯羨飛  
鴻山腰野人家小憩聊從容一招甘泉水洗我煩心曾數轉  
益高峻巖巒蔽晴空古德杳何許遺跡白雲封悟彼桑下意  
慨茲世情濃鼓勇到絕頂寒日淡濛濛黃皮與紫蓋屹立眾  
所宗大瀉橫西北劃空如崇墉天風四山下萬壑聲洶洶祇  
疑人世絕仙樂聞撞搢相對久無語晚煙生重重迢遞下山  
去倦焉路旁松

夏日讀書大悲山房

彭賢廣 邑廩生

余愛山之幽山亦愛余拙暇輒來山中廿載此清絕青山長



此青余髮已半白落落舊生涯幾人自怡悅老屋數椽支浩  
歌慣擊節猿鶴久相習狎處豈分別石古松枝平蘚深水泉  
冽枯禪響虛籟寒巖冷白雪此地虞與歐元虞伯生也曾臥  
車轍空山有神物何年啟丹穴

秋霽登峯頂山眺遠

辛啟泰

窗晴諸鳥散林淨覺山秋偶尋蠟屐着高峯宿霧收老竹穿  
石瘦古洞闕雲幽振衣陟絕巘逸興渺滄洲決背天地外羣  
山若沈浮仰睇天門詆日月轉雙毬秋色蒼然來地軸清氣  
適何當登泰岱俯視小九州

會仙塘

辛炳喬

灌木鬱暝色沙澍杜蘅香好風吹汎瀾言尋曾公塘曾仙眼  
如月天機參微茫結廬人境外叱石猶叱羊行歌蒿里曲寄  
此水雲鄉歲歲春復春白鶴下翱翔石壁砒然開御風恣徇  
祥剔蘚讀薤書蒼煙扃仙莊

留別絮言

三十首錄六

衛鵠鳴

步上南浦橋南浦水盈盈山原忽開朗十里稻畦平往來袁  
州路霜中月下行多少惜別人對此不勝情

碧水繞花園兩岸垂楊柳寥廓九仙塘一灣烏溪口回瀾石  
橋下空天立釣叟烟籠月照中消我酒幾斗

不知雙虹橋深遮白日幽當年清溪渡今者市人稠何事眾



高書集卷之二十一  
四  
忙忙日夜行不休欲與洗塵心泠泠聽上流

秋聲北門外懸流聽不住每當心意煩坐此消百慮露墮橋上月風入城邊樹欲以載酒船併載清涼去

泛舟下龍河長橋駕橫空河邊幾萬竹併作橋間風悠揚讀書韻來自桂花叢聽之忘返棹山迴夕照中

生有山水癖離之覺心痒况多素心人願與恣清賞城中可採蓮城南可盪槩秀絕筆架山看將應春榜

哭辛筠谷學憲

教授 盛大士 鎮洋舉人

蒼松無媚姿獨得乾坤正公以古名儒躬遇

天子聖立朝持大體臨事毋不敬入參廊廟謨出握文章柄道氣

含沖和柔色式儀令瑩然冰雪胸中有薑桂性

愛民如保赤所賴慈惠師如何催科吏牛屬良有司東南日凋敝元氣誰扶持昌言闢羣議獨荷

主上知莠草固當鋤勿傷蘭與芝苦心庇孤寒積憂病難支失聲哭寢門此意復告誰

士氣屈者伸士習衰者起鼓篋肄三雅乃是進身始以彼不肖徒穿窬弄長技或嫌法大苛誰識意良美至今感恩者翕然稱國士

美人隔雲端嗟我落塵鞅自分變後桐遑冀物外賞一詩題江亭十年涉夢想使車泣淮海王事勞鞅掌我無孝章名公



高唐縣志卷二十九  
如孔文舉我非寒山石公爲庾開府苦調空復彈哀絃不忍  
撫羊曇過西州落葉紛如雨

我生胡不辰賦命嗟窮薄童烏輟元草予季年又弱秦鏡堂  
前懸驪珠暗中索遂令樗櫟材亦荷門墻託開尊悲喜集東  
筍詩篇作以詩受公知有淚爲我落我詩持奠公我淚已先  
涸

一棹冒秋雨晨起謁我公歡其辱投轄欲效陳遵風抵掌議  
時政出口無雷同家事及瑣屑一一詳始終客歸不可留淒  
然與公別送我江之干昏黃日無色贈物表素心何以報公  
德

客懷鬱不樂衰病日以深北去一葉帆遽令音書沈聞公吳  
門歸亦受風霜侵道心定而靜瘦骨寒能禁泰山胡然頽素  
車馳已晚巫陽下九闌或望靈旗返

古人慕修名公自千秋擅會聞有道碑絕勝丁儀傳諸孤泣  
致辭猥以屬下賤負重力不勝答書手頻顫彈琴不成聲收  
淚且磨研音容不可追文字空餘悲茫茫泉壤隔此恨公其  
知

七言古

靈棲巖

宋 蒙

巖巖巖山如簇磊磊落落石如屋上有綠樹之陰陰下有



寒溜之涔涔通天有竇十餘丈遊子捫蘿來復往是中端合  
巢神仙桃花流水何杳然我來正值春風暮似笑賢勞又還  
去準擬醺酒聊從容對此坐想飛來峯

舊志作張謬詩  
茲從嘉定志

謝山劉長者讀書堂

楊萬里 吉水學士

前輩學詩如學仙吾謂讀書當亦然神丹九轉骨可換聖門  
一簣功相先劉公結屋高山巔豈效羽客餐霞煙鄴侯三萬  
足高尚霧雨養豹知幾年文章笑拍班馬肩書堂看來咫尺  
天會當擢桂廣寒邊祇借謝仙雲鶴駢

前題

謝 新喻尚書

憶昔侍親宰鈴岡首訪盧老讀書鄉鍾山臺高蹟成古苔漬

墨沼文猶香常嗟盛事少繼躅喜聞劉公志幽獨結堂宛在  
謝山巔仲初成仙舊巖谷牙籤萬軸填窗櫺煙霞鎖封寧著  
塵風雲夜伴幽人宿便覺富貴來逼人况公一方為長音兒  
郎競立文章價他時定有奪錦標要與老盧爭逸駕

送張元直令萬載

蕭 燧

少年秀發似洛陽文章氣焰鼎力扛嶄然頭角何可及輩流  
見之心自降詞源湧出遏不住渾令冷泉亭下開闡聲淙淙  
十八年前識芝宇明以功名拾芥俊逸兼奇龐驂驪一日走  
千里胡為暫淹子男邦春意先聲到雞雉父老望望飛鳧雙  
漢庭諸公說佳政召音早晚來龍江自應寅之敢言地不爾



玉堂雲霧窗過門訪我又輕去匆匆酌別安用買羊羶臨分  
欲寫贈言意慙無健筆如長杠

采嘉定志補

題南平王鍾傳醉搏虎圖

元 吳淵頴

南平酒行山險巖日暮猛虎相抱持僕夫辟易不敢近雙手  
現出十狡狴口乾大喊眼光爍腰無寸鐵起徒搏沙飛石走  
風爪牙草折林摧雪齧齧人強獸勇盡力爭形格勢禁過用  
兵英雄變化動霹靂富貴偪稜收櫓槍老羆當路叱貉子指  
揮六州稱刺史摩挲虎須淮甸鬪啖嚼虎膽聞城靡少年本  
是貧少年狂卒成功等醉癩盜應有道幸竊柄王竟不死還  
橫鋌一時豪特誰與畫千古畫圖專足戒投弓棄箭浪紛紛

馬上愧殺裴將軍

采陳府志補

題歐陽龍南所藏雙龍圖

揭傒斯

七十待罪奎章閣羣玉府中光璀璨就中董元出蟄圖萬物  
如睹聖人作天昏地黑雷雨垂魚鰕盡逐神龍飛飛流上天  
灑天風絕壑似與天河通山開石裂電火紅萬木顛倒助豪  
雄先皇一覽驚且愛高懸長與御榻對眞龍已入白雲鄉空  
有畫圖今尙在何處飛來兩神物開卷淒然滿頭雪

采贛州府志補

大悲禪刹

虞 集

不夢金人長丈六中華那得通西域象教流行遍海隅龍江  
崇奉成真癖佛殿峩峩高倚山經聲細細朝連夕邇來行人



行路難促裝常候鐘敲畢

鼓樂名山

虞集

太平和聲天下作太平去後淳風薄後庭玉樹久摧殘南苑  
霓裳竟寂寞此山萬古留佳名此地萬年得長樂風清月白  
天籟鳴滿耳如聞奏韶濩

雲松巢為胡志同作

明梁寅

雲松巢誰所居乃是洪崖之老仙高栖宜陽北翠谷同匡廬  
松花金粉酒堪釀茯苓截肪疾可扶戶牖玲瓏碧雲入以當  
瑤席掀龍鬚峨峨雲岑鬱鬱松陰白鶴宵唳元猿晝吟今之  
曹劉沈謝輩為歌雲松多妙音妙音世希有老仙筆下蛟龍

走雲松歌詞看在手仙字詩留天地間馬蹄之金其長久采石

門集補

草書歌為志同作

梁寅

憶昔弱冠遊南昌健步文苑多賢良草書追古今鍾王胡君  
筆勢妙莫當春秋一經究周綱短長詩歌攀晉唐以書得名  
時所尚矯矯龍遊鴻驚翔鷹之海青馬驕驕豨鬣稍健煤漆  
光冰紈繭紙疎作行水蒼玉軸懸堂房觀者駭吁環若牆珊  
瑚文犀璆琳瑯無足乃能走四方跨楚連吳譽飛揚荆金充  
貢驪珠償怒猊抉石石顛僵渴驥飲泉泉礪硯羞彼蚓蛇壑  
穴藏昔臨鮮于爪翅張後師班侯變老蒼當時同流爭頡頏



百羽竟避孤鳳凰揭曉擅奇白玉堂晚有危素擅芬芳大江  
以南獨騰驤君胡爲乎遯僻荒二十年來異故常雲松結巢  
老宜陽嬾嬾靚服誇宮牆劍舞尤羨公孫孃嗟余與君友求  
羊白頭俱在猶康強欲如鴻燕星參商百金一字懷不忘緘  
書遠寄文錦香爲寫此歌爲報章百齡慎愛遙相望

采石門  
集補

袁州守何澄爲郡人郭瑾給事作山水圖求題

習嘉言

新喻  
詹事

青山翠嶺開芙蓉層巒岌嶂橫蒼穹白雲片片間紫翠似接  
岷峨千萬重山下湖光漾明鏡碧波一色涵天淨湖邊喬木  
列森森人家占得湖山勝人家共喜逢時平年來雞犬亦不

驚煙迷渡口無過客白日欲暮孤舟橫伊誰貌入畫圖裏竹  
鶴山人性所喜山人出守向宜陽郡中惟有佳山水山水怡  
情春晝長公餘無事退黃堂興來隨意恣點染筆與造化爭  
毫芒黃門郭君郡中彥得貺新圖增歎羨官舍朝回清翫時  
恍惚故鄉長對面我家清江江上居煙霞近隔咫尺餘謝官  
他日共歡賞寄書先託雙鯉魚

采新喻志補

題綠陰書屋

大學

劉定之

永新

君家住在清池邊繞池松竹高參天綠陰深處讀書屋薜蘿  
結構三兩椽翠梢滴雨溼窗紙風送落花入硯水鳥啼祇近  
當戶枝飛來飛去鏡光裏嗟君讀盡家藏書致身當路逢唐



百華集卷二十九  
虞春來回首思故居萬卷森然猶自如後人爲我阻芳腴莫  
遣紛紛走蠹魚

綠筠書屋

黃

蒸

邑人  
教授

世人紛紛皆草木惟有王君獨愛竹愛竹之意豈有他軒居  
瀟灑絕塵俗軒前軒後竹萬竿節金戛玉報平安每從詩禮  
庭邊見久向琴書窗下看大根臨夏翻晴籜小莖沿砌森頭  
角會看裁作紫鸞簫和音嫋嫋諧鈞樂君不見當年姚魏牡  
丹花雖云富貴何足誇又不見章臺昔日依依柳雖號風流  
詎能久歲晚冰霜寒沍時淡煙疎雨只空朽何如此物獨堅  
剛托根到處多篔簹座上每看渾不厭四時長有色蒼蒼

綠筠書室

龍

駿

邑人  
知縣

幽篁夾徑春雲起曲閣長廊淨如水曉日移陰上石闌主人  
嘯傲煙霞裏時從賓客坐徘徊翠色娟娟浮酒栝直須勁節  
拂霄漢會見九苞丹鳳來

小嶺樵歌

知縣

宋九儀

邑貢  
生

郊坳不禁芻蕘往歸路夕陽歌興爽信步閒忙早早遲相呼  
前後三三兩兩芒屨篠杖足生涯斷隴橫江到處家檣柁一肩  
堪舉火擔頭收拾度年華

坤山夕照

宋九儀

西來一帶山容碧對峙參差如兩腋太古常看晚照妍中天



時有陰雲繹橫陜關鎮澗泉流入郭縈紆穩渡頭不是斜陽  
銜暮景誰憐春色在林邱

萬載謠

國朝守道施閏章 江寧進士

山城夜閉中夜雨夜聞城中嘯猛虎十家九家聲暗吞城中  
人少荆棘存城高丈五半傾裂中貫長河無水門盜賊哀憐  
不肯入官吏倉皇征稅急雁集鳩居一何多土人拱手客種  
禾殺牛沽酒醉且歌滿眼蕪田奈爾何

麻棚謠

施閏章

山棚鬱鬱多白苧問誰種者聞與楚伐木作棚禦風雨緣岡  
蔽谷成儔伍剝麻如山召估客一金坐致十石黍此隰爾隰

原爾原主人不種甘宴處客子聚族恣馮陵主人膽落不敢  
語嗟彼遠人來樂土此邦之人為誰苦 二篇采陳志補

鵝鼻峯

辛繼攀 邑貢生

陽樂城東小蓬萊蒼翠照耀金銀臺草堂相對空相望落莫  
大懼山靈哈林間不速三五友奇懷拗膽輕崔嵬遙看銅鉦  
日初上山花山草明巖隈長空好縱千里目無端濃雲潑墨  
來顛風吹雨西北角憑陵猛氣走電雷草木為仆石為泐如  
將遇敵鋒交摧須臾滅沒輕煙捲仍餘礪谷聲喧沓浮光黯  
黯天漠漠巒岡半入雲濤堆百年此山遇此客靈臂曷不撐  
天開得無虛名悞觀者故吐雲霧深藏埋或畏筆墨工鐫刻



高車果上卷之二十一  
秀靈洩盡天爲灾欲知特呈煙雨障空歎此日敗興回酣醉  
村家傾腳酒分袂平曠各徘徊龍江山下頻回首應念茲遊  
眞快哉

月臺山寺

有序

辛金澄

月臺山踞邑上游其寺故民居也山後有古木一株扶疏  
秀挺及遭喪亂廬舍悉毀而樹亦朽先君子於順治間讀  
書七寶山房爲邀同志共建三官殿不踰月而朽株復生  
秀結如蓋甲寅之變孤城兩陷焚民舍殆盡廟貌如故更  
建關帝祠宇於其右益信地脈  
發祥非偶然也因賦此以志喜

嗟彼月臺兮久翳榛莽中霜冷生愁籟露白助燐紅隱  
隱遍寥廓天矯枯株虬龍若伊伊啞啞夜棲烏辜負長空含  
寂寞地靈人傑果何憑枉傾北斗望月吟先君從來山水癖

爲邀同輩結叢林叢林蔚起發幽趣飛錫跨鶴任相取疊閣  
層巒出雲霄寶幢橫空龍虵走枯枝頓起弄春風金波奮躍  
耀長虹光浮萬嶺嵐如翠雨霽千家珀色濃紫蓋頂銀山堡  
康城河作帶鵝峯勢回抱果爾神人居鈞轉造化機縹緲生  
帝坐歲歲挹清輝

龍山

乾隆己卯以忠節龍公  
鐫號龍龍山載郡志

辛廷芝

康樂龍山山中傑俯視諸山等坵垵克生龍氏英毅人此日  
精華應欲竭文疊袁山峙一方嵯岬秀出南斗旁此山風格  
遙相望要與三山無低昂天下名山多稱最空山無人曷足  
賴吾以斯人號斯山落落聲名從此大好將得人賀山英光



耀不藉春花榮當年偶爾供登眺此日清風萬古情

冠邱山

辛廷芝

白良山繞成城郭左右迴環萬馬躍兩水夾浮龍欲飛一峯  
中尊天外落山住倏爾嵯巖開小有洞薄金銀臺瑤草不隨  
秋霜隕山風似帶仙氣來曾公一墓寒塘裏眼窺天奧何取  
此氣擁南屏北障雲秀挹千巖萬壑水地能蔭人人何在陵  
谷千年亦變徙畢竟青鳥術何恃我起呼龍龍不起

九頂山

李榮陞

石屏西側連夕望九頂全嶂墨堆雲夜夢山神滌山出未明  
顛倒開衡門風日遲回果愜眺諸兄曳杖相追奔峭磴入自

窺阮口曲折登登履平畝紙確疏泉風爲守盤石醉人濃於  
酒繞籬新玉欹數枝弄瀑其中迅雷吼人言此是山之心仰  
睇雲端矗者九低徊先壟撥前茅蜿蜒左右窺龍巢遙峯拔  
地四面包中有削成蜷脊高躋攀分寸落不落萬里一瞬窮  
秋毫人生橫據十笏大誰以天地爲輪蓋礪礪團霄撫辰魄  
依稀控氣觸仙蛻仲兄採藥師神農季兄長嘯御列風餘山  
鎖電驅雷公驚出黃貓跳天空晚燈碎碎困撲地絕頂已著  
霞綃幪

克巢砦有序

李榮陞

高村東行二十里溪南有山虎牙屹豎絕頂開平窩多瓦  
甃故老傳云元末居民捍寇之地劉克巢砦主也故以名



或言偽漢將歐普祥滅之又謂明世土寇就飲山下豪家而敗豈有賊巢密邇山下人得晏如者齊東語不足辨山南西有豎旗峯甚險側稍西有梳粧臺土人云當時對山擁水絕高溪積爲長湖望上游九頂虛映如婦人窺鏡整鬢亦一奇也

芙蓉搖霜秋向暮野艇橫篙少人渡羣峯蘸影夾溪源溪煙數里平山根窈窕丹黃綴天末溪女連袂歌采葛山頭餘石驚雷碾山曲衝風迅箭箬煩聞元末兵寇喧有客過水峻重垣巢幕焚林亦難騫踟躕窮谷聲併吞紛紛齊語詎須辨霧豹安可儕風犬望湖之亭稱望夫後代婁妃節因顯漢女豈受花源迷秦人自得捍關選粧臺西攬天鏡慳梳出切雲崔崖鬢當時逃死足佳趣恰借眉窩夢雲雨脂香剝盡氛亦平

野花年年臺下路

董洞

李榮陞

石亂無路蒿平肩洞口垂蘿暗炊煙敲火下踏饑蛟涎聖巷斜通丈室巔白衣臞老蒙頭禪宛轉熹光反而復樵蘇踪斷怯幽獨翳翳董園搖風葉悵然穿暝下山麓回首怪峯左偏

讀書紫蓋山

孫馨祖

紫蓋山屬謝仙島仙去山中餘茂草當年丹竈不可尋空餘寺鐘聲縹緲孤峯聳出勢最奇日登絕頂摩蒼昊羣山不敢相倚傍蒼茫萬里人浩浩山下集雲舊遊處八年奔走失故



道眼底浮雲在寥廓富貴如何此山好山靈笑客心無常安  
能長此守枯槁棲山自覺面目清入世安知盪埃老清泉白  
石不解取雕蟲蝕蠹空論討嗚呼山靈莫相惱卽今讀盡山  
中書他日歸來應須早

題龍江橋圖

法式善

蒙古祭酒

龍江橋下江雲飛龍江橋上行人歸行人稱羨橋營緝三十  
年中祖孫及孝孫敬奉橋圖來未述祖德先悲哀我對丹黃  
心獨喜載誦新詩歎觀止匡廬石氣鄱陽風生平慨想柴桑  
翁青原峽雨澹秋夢洞底猿聲江上送推窗延月照畫圖萬  
峯蒼翠松濤呼夕陽在山紅滿湖晚風獵獵吹秋蘆尋詩人  
至不下驢擔者荷者漁樵徒指點江上辛公廬辛公子孫能  
讀書

書堂山懷古

辛炳晟

翟泉鵝飛尙典午景畧不屑桓宣武撫枕寂寂河鼃生卻喚  
孫郎計門戶滎陽太守謝病歸漢晉書成厭跋扈當年蹇步  
習家池間巷浮沈守環堵豈知五丈池草滋滄海橫流沸聲  
鼓夫人城崩萬氏入馬蹄平踏千衡宇空將半士誇漢南鼃  
聲紫色焉足數飄飄可惜彌天雲蹉跎抽身免圭組故山風  
鶴難可懷間關迢遞歸王土衣冠吳越正朔存南董何人老  
胡虜艱危想見入林深西山窮谷遠豺虎世亂生還定無冀



青車賦上卷之二  
坐閱巾箱送風雨卽今憑弔讀書堂星霜著迹知幾部尋眺  
故蹟追風流四山松桂浩無主耆舊襄陽此流寓居遊應將  
國史補十六國事如牛毛十八家書只帳簿書生識地何崢  
嶸隻義猶堪紫陽祖棗木山空魂魄棲兒孫奕葉依屋斧策  
馬卻問騎省墳江山半壁悲終古

遊謝山

彭賢廣

鐵笙羽鶴何年跨不道茲山姓猶謝神哉造化留混茫何人  
探奇開闢洗洪荒芙蓉削出萬仞岡千葉蓮花世界藏我來  
剔蘚攀蘿訪仙跡黃毗以西聳半壁仙人呼之渾欲出幽巖  
層厓歷不盡望去若近行難覓疑有疑無思悄然滅沒隱見

見飛鳥下有白兔搗藥之丹竈上有袂襖踟蹰之翠石頃刻  
霧露晝晦陰冥天風煨煨耳畔聞聲攝入太虛如雷如霆層  
雲靄兮盪滌丹梯豁兮空靈髣髴夢之初覺醉而忽醒吁嗟  
乎丁丑開山幾時代蟲書鳥跡真奇怪仙人已往山不老笑  
我不與黃鵠比翼又烏測乎塵囂之外祇今松壑間疊疊風  
泉響虛籟

遊石嶺巖洞

湯彬士

邑人

頑石磊砢亂突兀萬古前誰鑿山骨峭石橫排作屏風下有  
深洞黑羅刹遊人秉炬方敢前云是前代蛟龍窟初歷一洞  
尙虛豁漸進逾幽路較濶危磴幾級石髓滑陰風慘慘凜霜



雪入眼恍惚生精靈蝙蝠驚飛去無形積水之深不計年游  
魚無目忘陰晴冷氣全欺炬光淺點點熠熠鬼燐青遊人力  
竭心骨驚深處畏進足自停當年蛟龍戰風雨穿山穴石留  
險阻相傳異僧求甘霖探幽曾一窮步武我意未盡興勃然  
既出更跨層石巔捫苔刻壁書詩篇山靈我欲共千年

紫葢尖

辛元辰

邑貢生

秋澄景物歸山水亭亭迤西峯獨紫紅日一輪曉霧收丹梯  
百丈青山峙行行斜徑足蹒跚扶疏濃翠遙相倚忽聞天半  
讀書聲犬吠有人爲倒屣各山自古得名人分韻香清聚蘭

芷

時王介眉聞子銘  
昆玉在寺讀書

爐煙縹緲鎖禪關書卷縱橫堆寺几相

攜旋復陟其巔一覽衆山皆小矣極目雲天四望賒浩蕩情  
懷千萬里霜楓如醉倚山腰身在朱霞映朱履幽崑曲壑隱  
斜暉照耀層巒如散綺蕭疎荻葉幾灣分迢遞布帆數掉止  
歸來已是月黃昏過眼風光疾如駛安得太白驚人句芙蓉  
削出青天裏

書堂山彥威書院落成喜賦

辛師雲

魏丕禪漢作天子誰其繼之司馬氏紛紛篡奪相效尤乃與  
六朝相終始仲達方欲師阿瞞晉臣焉敢議漢祀東西百五  
十年中暗室無燈人心死誰秉直筆陵董狐咄哉四海習鑿  
齒習公博洽著漢南征西幕府更誰比風期直邁劉景升奇



才推重袁建武河內大縣紫髯翁雄武專朝恣跋扈為爾寂  
 寂文景笑寮佐惛息敢正視襄陽別駕氣如虹獨批逆鱗申  
 諫沮笑彼齷齪謝侍中君拜臣揖作何語直道難容觸雄猜  
 遠郡滎陽一麾指天惜良史教生全太守蹇步歸田里永固  
 龍驤萬騎來空將安輿辱半士身雖可致道難屈全節不受  
 苻秦仕可惜彌天釋道安同輦乃遭權翼毀中原互解國步  
 危翩然逸翮辭簪組歸來卻卧茲山中烟嵐清澗供吟几五  
 十四卷漢晉書褒貶直堪春秋擬帝蜀黜魏尊本朝皇皇正  
 統論非侈千秋亂臣心膽寒豈獨操賊奸魄視觀閣令史本  
 蜀臣三國尊魏義何鄙貧干斛粟作佳傳識見庸庸固應爾  
 孫干奇詭王混淆鄧謝沉複滋無取野民晉紀寓懲勸亦復  
 屈身事逆楚曷若彥威貶偽朝大義遂為紫陽祖書堂兀坐  
 閱滄桑不聞中原沸鼙鼓英雄割據競戈矛書生筆削嚴鉞  
 斧卽今公去干餘年四山猿鶴悲烟雨松風猶作清嘯聲谷  
 花尙妍精舍址坐令勝蹟久湮埋墨池蒼涼復何是清河張  
 君真好奇日策筇杖生仰止山椒為闢讀書堂歲歲生徒奠  
 清醑應招入君此遨遊棗木之坐相尺咫余亦弱冠觀羣書  
 論史幾合前人旨生逢

明盛希利見有道貧賤聖賢恥廿年浪跡走燕齊辜負茲鄉好山  
 水何時蠟屐踏碧霞手摘溪毛拜靈宇舉頭卻見卓筆峯一



尖屹立青雲裏

五言律

題湯周山

唐 失名

湯周二大仙廬此得升天風俗因興廟春秋不記年錦雲張  
紫蓋琴溜瀉鳴泉丹竈猶存鼎仙花發故園

題高城雪堂

宋 邑祝 勛 三衢

築室煙霞窟門開紫翠堆真成雲挽住不為景催回山月窺  
檐入溪風掠坐來鑪薰兼茗飲淨拂綠琴埃

自題樂隱軒

元 譚 觀 南昌 太史

一徑營門曲重檐壓路危杏花村店酒楊柳野橋詩地暖鶯

來早山深雲出遲雨餘動東作旋鑿蔭田池

柴門櫟木扉村店野花稀粟熟酒初釀黍香雞正肥園紅曉  
霜改崑白暮雲歸眾鳥從林盡天空一雁飛

歲暮田事畢農談相往來茶香冰澗水詩思雪村梅囊熟茅  
柴酒鑪深楮柚灰陽和露消息東作又相催

錢塘贈黃子中還江西

明 王 禕

逆旅暫攜手東風拂面塵乾坤戎馬日江海別離人歸路邇  
陽外羈愁浙水濱歸哉倍珍重行勿負蒲輪 采西江志

靜樂軒

易 節

高懷絕塵想習靜棲幽林寧甘元默處肯與喧囂尋止水見



初性澄潭諧素心樂茲足自養千載希其音

桐岡書屋

大學士楊士奇 泰和

桐岡白雲淨中有讀書軒竹色清依檻波光綠繞門吟詩暢  
餘興把卷詠微言亦有幽棲者時來共討論

崇信寺

彭澄

城西南郭寺崇信幾經年市近塵猶遠門深路自偏鐘傳百  
里韻香繞萬家煙誰識浮生夢談空覺皎然

遊謝山

彭箋古 邑人 經歷

躡足謝山上肩輿路幾程殘花四五樹啼鳥兩三聲雲向山  
腰起人從樹頂行羽流如有約兩兩路旁迎

次張明府遊淨安寺韻

龍玠 邑貢 知縣

促席坐繁陰雲林積翠深笑談傾臘蟻啁晰響山禽吟眺舒  
酣思閒遊稱賞心高陽舊時侶公暇一登臨

贈藍近山學博 珏

李一德

北闕除書遠南溟振鐸賢衣冠餞洛許簫鼓度瀧川雨滿枕  
椰暗風輕翡翠妍青氈多暇日應理舊時篇

淨安寺

宋九儀

淨域臨江滸僧堂瞰石門風雲隨去住鐘鼓自朝昏天棘閒  
秋色蒼苔剩路痕猶懷元閣草燈火夜深論 從江西詩徵攷

遊九仙宮

宋九儀



車鼎志卷二十九  
羽客翩跹去珠宮馥郁開煙霞遠道隔簫管洞天來池夢生  
瑤草庭經朗玉臺不知天上鶴緱嶺幾時回

龍江雪霽

楊遇用 邑人

雪色開江浦晴曦動曙天平蕪涵宿潤野樹破寒煙一水浮  
光轉千峯遠翠連南來數行鴈搖曳白雲邊

翠巖亭小集分得遙字

楊遇用

別業臨江渚幽尋一逕遙池魚依凍藻籬雀戀寒條酒氣林  
中暢茶煙竹外飄醉餘凭望處隔水見歸樵

翠巖亭小集分得光字

張汝誠 邑人

路繞青山曲亭孤綠水旁風帆懸晚照沙鳥覩寒光谷口終  
耕鑿濠梁儘坐忘當尊裁白雪吾輩總高陽

翠巖亭席上題

張汝誠

石徑逶迤好孤亭聳翠巖竹涼收羽扇藤老掛絺衫坐裏聞  
漁調杯中過客帆對君思處士谷口有招緘

遊東樵書屋

周業孔 安福知州

車馬全非郭煙雲半是村雙池平抱戶一徑曲通園柳色搖  
書幌梨花落酒樽七年經史意重得細評論

謝山靈應觀劉長者讀書堂

劉芳譽 邑人

厭俗橫青眼尋幽陟翠微門深鎖蘿薜徑滑翳苔衣含霧書  
堂寂迎風崖樹欹雲關鐘磬裏拂石坐忘機



題莊巖寺壁

郭致仁 邑人

古寺依城僻重來路不迷山川春日麗殿閣野雲低老樹空  
堂色幽禽對客啼秋風如再過擬向此中棲

贈萬載令范抑庵

國朝史大成 浙江修撰

撫字朝廷意催科好酌量遙知民力竭應不異吾鄉亂後花  
洲在公餘荔子香殷勤能愛惜風雅卽循良

自瀏陽還萬載

史大成

青霜三日曉微雨萬山東澗斷危橋度峯迴遠徑通僕夫移  
樹杪煙火出雲中行路難何有歸思逐雁鴻

遊翠巖亭

張日豫 邑人

禪室臨洲渚巖亭擁翠開祇園閒世界方丈小蓬萊獨鶴穿  
林去孤僧採藥回圖書今尙在留共曉猿哀

遊新庵

張日豫

倚杖崎嶇裏半山邱壑連結茅依古木汲水引寒泉鳥道藤  
蘿織僧居煙雨懸雲堂深處磬空谷一聲傳

宿周家市山庵

吳自肅

不是偷閒步胡爲到此來逶迤尋徑入剝啄始門開匹馬荒  
村暮孤行寒雨催懸知今夜夢定在白雲隈

月臺山寺

常維楨

香刹山城近庭階盡碧苔雲凝千樹合風漾百花開入院知



高車鼎士考志 卷二十九  
僧靜聞鐘見鳥回莫愁歸路晚自有月光來

宋府志改

其二

常維楨

花開幽徑滿風動野雲過五夜鐘聲近三秋客夢多紅樓迎  
翠竹白鳥啄青蘿已悟浮生事山僧意若何

暮秋之花塘偶作

常維楨

馬頭紅葉落谷口白雲生莫怪驚風急還疑疎雨聲山溪流  
出靜嶺樹影移輕一日秋空遠寒蛩隱草鳴

秋夜之藍田

常維楨

山徑行來晚一灣月掛西竹高疑路斷星密覺天低溪水三  
秋淨村雞半夜啼白雲含露冷何事未尋棲

宿白楊山寺

常維楨

鐘罷僧歸室禪燈繼夕暝樓高千佛靜柏古萬枝分夜柝聲  
如塞晨爐香若雲因思支遁事更憶遠公文

讀書莊嚴院

辛金振

邑廩生

不從塵市擾築墅傍莊嚴梵唄傳高閣天花拂畫檐溪迴萬  
井合雲繞數峯織讀罷追遺響蟲聲已度簾

重過莊嚴院

辛金振

憶昔溫經處巍峩古殿齊棟摧迷蔓草砌冷躍莎雞莫辨風  
旛動徒窺雲鳥低我生非幻夢陳壁且留題

題鎮龍庵

張列辰

邑人



白竹勢龍從凌霄有梵宮雲棲禪榻冷月映佛燈紅白鶴巢  
珠樹青獅絢寶氈心空塵自遠說法可降龍

夜讀半雲庵

宋希陳邑舉人

漏滴催幽客殷勤意最真燈孤惟有我僧定若無人斗室空  
千古疎窗映列辰一番風雨過庭草又生新

題莊嚴寺壁和郭致仁韻

辛金衍邑貢生

七寶何年建門幽覺徑迷欲求芋魁熟但看石頭低山斷雲  
來續林空鳥倦啼個中尋了悟爲假一枝棲從家集定本改正

龍河書院卽事

魯鴻

別業依城北蕭然水石間有時招月醉盡日看雲閒煙雨門

前渡牛羊屋上山隔林聞犬吠鐘定覺僧還

吏隱吾何敢山林興未輸談經淹日月行路識生徒亦有榛  
苓夢其如松菊蕪故人重勸駕懷古意躊躇

高峯寺訪慈茂禪丈不遇

郭大鼎邑人

遠公緣不遇絕境足初經竹懶迎風動雲癡度壑靈怪禽人  
對語幽澗水搖鈴惆悵尋歸路回看一抹青

紫蓋峯

辛文彬

古寺嵐光滿寒陰積未晴青松含雨意綠竹助風聲春暮花  
仍放山空鳥自鳴悠悠澄俗慮鐘磬有餘清

西屏山寺

辛紹業



喬木簷邊合新秧夾路長

寺內稻畦數畝

禪扉人寂寂經室梵琅琅

幡影看臨砌鐘聲不過牆淡然銷百念鼻觀旃檀香

輓辛筠谷學使

知縣

李兆洛

常州進士

哲人悲日遠模範至今垂樸訥仍儒素殷懃作導師薰蕕令

自擇蕭蕙許同滋已盡嗟薪火無窮是教思

文豈輪轅飾詞由德業成一心培國脈百計軫民生陳力無

中外當官有性情願憑青史筆為勒太常名

五言排律

謝真人還舊山

唐范傳正

麾蓋來仙府笙歌入舊山水流丹竈缺風起草堂關白鹿行

為衛青鸞舞自閒種松鱗未老移石蘚仍斑望路煙霄外迴

輿嶺岫閒笑他遼海上空見羽衣還

康樂風景

國朝

常維楨

溪澗西江接峯巒南嶽連邑荒城落雁市寂院啼鶻雉堞藤

蘿絆羊籬橘柚編山中多鹿跡竹裏少人煙密雨常經月淒

風更接年喜邀高嶺入恨速夕陽偏桂實秋深結梅花春到

妍官貧無宿米民病半蕪田棄葛空絺綌遺桑擲繭綿蒼茫

難自慰長嘯獨生憐

石庵

常維楨

石洞危巖下琳宮峭壁前高岑惟鳥過幽徑獨僧旋鐘度長



松老風吹嫩竹偏磨磨不避客嵐霧只迷天秋有飛鴻報春  
憑杜宇傳雨來千澗滿雲起萬峯連應是鴻濛日神令鬼斧  
穿

常侯別墅 宋希陳

康樂荆榛關委蛇三徑開哀鴻今慰矣馴雉日悠哉杜母與  
情協潘花滿縣栽公餘惟飲水乘興便登臺環戶蕉抽綠侵  
階露濕苔垣低迎月入庭殿任風來鴟嶺當窗龜龍河繞帶  
洄敲詩不讓李步雪獨宜梅不假簪纓氣居然鳳閣材佇看  
丹詔下移座向三台

七言律

雲蓋山泉 唐 唐 廩 正字

危嶠高高幾十層梵王宮裏一泉澄引來石竇明如玉瀉落  
山廚冷似冰淨影不關秋賦客清音時警夜禪僧從茲洞口  
潺湲去勢入滄溟豈可仍 宋嘉定志補

獻江西鍾令公 劉 望

負笈蓬飛別楚邱旌旄影裏謁文侯即隨社燕來朱戶忽聽  
鳴蟬泣素秋歲月已嗟迷進取煙霄只望怨依投那堪思切  
溪山路家苦筆瓢淚欲流 宋嘉定志補

宿萬載廣慧寺 宋 黃庭堅

鴉啼殘照下層城僧舍初寒夜氣清風亂竹枝垂地影霜乾



萬載賦上卷二十一  
桐葉落階聲不遑將母傷今日無以爲家笑此生都下苦無  
書信到數行歸鴈月邊橫

請志俱作張謬題崇信寺詩此從嘉定志按山谷集赴德平作

逍遙閣

洪炎

傑閣龍樓倚翠微中秋午夜望清輝桂枝委地三千尺柏影  
垂壇四十圍簫鼓或疑風雨下雲霞猶想錦帆飛只今井臼  
依然在不見歸來丁令威

采通志補

送張元直令萬載

謝謬

嘗抗封章奏九重忠言讜論動宸衷合從京國陪諸彥先向  
江鄉宰一同聯事每思天咫尺愛民常見日冲融如公人品  
非凡器想在黃扉手記中

采嘉定志補

建城道中

呂本中

建城南路入袁州怪石縱橫水亂流盡日衣冠足圖畫百年  
心跡在林邱中原未起重歸興胡馬能令此地憂浪迹江湖  
亦吾分運籌帷幄有留侯

采嘉定志補

靜樂軒喜成

張謬

邑令

山縣爲官不見山一朝列嶂忽當關抽身牒訴時舒眼領客  
杖藜聊解顏常樂本來由我靜倦飛每爾愧知還莫嫌邑小  
仍兼陋曾有涪翁賞是間

送龍南歐陽縣尹

元黃潛

絲綸閣下半同袍獨上南船去莫招出宰不嫌官俸薄過家



未覺驛程遙長溪白石晴雷轉深洞黃茅毒霧消想見行春  
有佳句坐令遠俗變風謠

宋通志補

賦得越王臺送萬載敖司令之官

郭鈺

吉水

層臺高與越山齊南斗諸星入地低海氣秋澄鴻雁到野煙  
春合鷓鴣啼官船北走輪珠翠幕府南開振鼓鼙側想到官  
多暇日登臨長聽玉驄嘶

宋西江志補

和寄龍長史

郭鈺

扇外風塵素不干湖光遙送酒船寬錦箋傳草春詞好銀燭  
燒花夜枕安四海交遊空老大百年世事半悲歡子真谷口  
深相憶黃獨無苗風雪寒

宋元詩選補

憶樂隱故址

譚觀

朝暉初斂夕陽收雲自無心水自流縱飲直將杯似海卧遊  
聊以屋爲舟橋分草色斜通寺樹罨山光半入樓歸隱始知  
閒是樂誰人肯向此中求

參江西詩徵改

歸石門山居寄胡志同

明梁寅

一別鍾陵音問稀金門應召燕鴻違江湖屢涉詞人老書劍  
猶存遠客歸春雨刷蒼思養病秋風製芟可爲衣暮年情味  
還相似幾誦停雲思欲飛

宋西江志補

被械寄家弟

龍鐔

邑人長史

一陣西風破鴈羣兩年消息未通聞祇圖宦達從先進豈料



才疎負聖君黃壤好將收白骨青鸞無復駕紅雲信知秋雨  
梧桐後翦紙招魂誦祭文

悟元樓

參政龍儀邑進士

祥雲渺處異香飄百尺巍樓構紫霄鶴轡應知天路近鸞乘  
那見玉京遙陰陰翠柏傳天籟冉冉元風引洞簫獨羨紫微  
居勝閣幾班仙侶任遷喬

題廣報觀

易節

翼翼仙宮傍紫霄玉皇香案御煙飄天河倒浸星壇近風露  
寒生月殿遙琪樹枝頭巢鸞鸞碧桃花裏聽笙簫倦遊欲學  
長生訣且向雲房覓子喬

送劉迪誠判通州

易節

同步青雲折桂香復聯珂珮侍明光判州已喜花生筆行卷  
驚看錦載囊京國十年交誼重河梁千里故情長黃堂到日  
多清簡好寄平安字一行

桐岡書屋

彭昶邑人御史

幽齋虛敞遠塵氛滿架牙籤漫討論涼沁綠陰松入座光分  
翠色柳環門晝閒當午琴三奏賦罷清宵酒一尊訓子已能  
酬素志殷勤會見課諸孫

題秦和觀

秦舊昂

迢迢仙境若難尋身到蓬瀛小翠岑梁棟倚天香霧合闌干



萬壽縣志卷二十九  
傍日曉光臨碧桃紅杏千年實翠柏青松半畝陰重沐相從  
情思好更煩揮翰寫清吟

前題

張益謙

邑人  
教諭

仙真昔日記曾遊遺迹如今幾度秋宛若瑤池環翠水空疑  
蓬嶠在丹邱風雲上接元都界星斗遙懸紫綺裘白鶴不歸  
丹竈冷幾回延月轉西樓

綠陰池

何文淵

廣昌  
侍郎

卜築依林絕世氛林間雅趣在斯文薜蘿繞徑秋先到竹樹  
侵檐日易曛研沼松陰凝紫翠紙窗花霧散清芬披圖卻憶  
藏修處充棟牙籤補典墳

其二

何文淵

松竹森森繞屋栽綠陰池上講堂開夜深燈影波中落晝靜  
書聲樹底來煮茗掃殘三徑葉敲詩踏碎半庭苔居人久作  
黃門客耿耿文星照上台

題廣報觀

侍郎

郭瑾

邑進  
士

巍峩樓觀聳層霄凜凜天風六月飄香裊金爐仙仗肅簾開  
寶閣畫圖遙紅塵不到閒丹竈彩鳳長鳴叶洞簫試問大還  
回首處滿懷歸思出林喬

憶郭則君

鍾復

吉安

縣城南面綠陰池上有高人樂盛時酒後靜觀前代史花邊



閒和昔賢詩春風門巷鶯啼早夜月樓臺客退遲捐世共憐  
成蝶夢承家應喜有麟兒

輓劉處士

李時勉

安福祭酒

藜閣雲孫世共誇林泉幽隱老煙霞門前種竹惟三徑屋裏  
藏書過五車舊友每尋陶令宅行人猶問鄴侯家朔風蕭瑟  
空齋冷惟見梧桐幾樹花

贈別郭邦器給諫

艾廣

永豐大理

幾年簪筆侍明光此日焚黃思甚長薊北秋風雙去旆江南  
雲水一歸航青蘋幽薦元堂遠紫誥親承御墨香別後重期  
何處是春風聯珮月蒼蒼

贈李蘊素之任汀州

大學士萬安  
眉州

玉麟遙捧向臨汀五馬翩翩喜氣生斷鴈謾添分袂恨東風  
偏稱過家榮官升已協三刀夢政治還聽五袴聲見說謝公  
樓尚在陳軒佳句好重賡

前題

李紹  
安成侍郎

詞苑春宮有令譽分符今喜拜新除朝班已別雙龍闕驛路  
遙乘五馬車致治政須勤撫字過家寧用久躊躇到來燕寢  
多清暇請看龔黃列傳書

前題

黎淳  
華容尚書

當宁安民任老臣近承遷秩寄專城春隨畫戟朱旛遠秋共



丹山碧水清聚散每懷金殿直循良都是玉堂情到時莫說  
終爲郡尙有三台待爾平

弔元翰林譚觀樂隱

張元楨 南昌庶子

雲擾中原幾屈伸碧山何事解簪紳溪邊恍似桃源路巖裏  
猶疑晉代臣翰苑久無金馬夢草堂聊與蕨薇親焚魚豈爲  
逃矰弋龍戰龍飛蚤繫神

遊九仙宮

陳 璨

幾年聞說元都境此日登臨興轉深白晝井寒龍吐霧黃昏  
煙暝鶴歸林道童熟煮爐中藥仙客橫彈席上琴卻憶避秦  
人去遠茫茫世事古由今

題謝仙觀

易聖教 邑人

浪說真人煉九還曾棲此地掩元關仙壇竈煖浮雲紫寶砌  
砂明照日殷劍卓降魔精化石丹成升馭鶴來山年開丁丑  
知何代真訣誰傳與駐顏

坤山夕照 龍江八景錄一

黃 景 上高侍郎

落霞散彩映簾櫳欲墜金盆嶺面紅鳥雀入林青嶂外牛羊  
歸路碧煙中酒帘處處收餘暝砧杵家家動冷風最苦無情  
烏兔急遞相催老白頭翁

寓靜安寺書壁

嚴 嵩 分宜少師

山城下馬對寒松古寺重門一徑中林靜已知巢鳥定月明



初覺梵堂空驚傳警鐸殘夢愛聽絃歌振古風卻歎此身  
渾似寄萍蹤明日又西東

遊九仙宮

巖嵩

鶴馭鸞驂去不還千年遺跡在人間應隨絳節朝金闕尚隱  
丹爐閉竹關福地煙霞元不改洞宮雲水自長閒無因得問  
長生訣乞取刀圭一駐顏

前題

彭澄

黃子求仙轉九還尚留丹室寄人間諸天雲外連三島萬載  
山中闢一關翠竹停鸞煙霧隔青溪飛鶴洞門閒昔年假館  
曾舒卷今日移尊欲解顏

幽隱自吟

張樂邑人

綠水青山是舊家種桃溪畔記年華招來仙侶因繁實勾引  
漁郎是落花欲向門前植楊柳何知野外樹桑麻早輸公賦  
供王事剩得閒身蠹五車

題靜安寺

失名

龍江江上一奇峯遙望樓臺聳碧空夾道喬松招夜月滿林  
幽竹喚秋風迎人野鳥間關語惱客巖花爛漫紅讀罷傳燈  
回首處禪關時有白雲封

重過靜安寺

龍愚卿邑貢學正

黃竹橋邊訪舊林上方隨起翠微陰和風梵宇疎櫺透皓月



禪房曲徑深三世種緣寧問報一經揮麈自須尋松窗蓮榻  
重相過細與山僧話古今

翠巖亭

吳山 高安尚書

翠巖宛在龍江上占斷青山萬疊幽泉石座間成一笑乾坤  
高處著雙眸紅塵不到亭常靜明月來時夢正悠老此巖居  
何所事清風千古說巢由

贈彭水部

吳山

羨君今作治河使卻憶扁舟共濟時寒夜客牕頻過酒中流  
擊節並哦詩風塵擾擾原無定松柏蒼蒼久自知結綬彈冠  
如可慶青山綠水更相期

前題

張春 新喻編修

四郊煙雨馭輕雷水漫河橋畫鷁催聖主正須經國計使君  
應是濟川才湖山杳靄開淮甸雲樹霏微接楚臺莫道坻京  
都邑盛年年憑仗萬艘來

送宋培節還康樂

范欽 浙江知府

秦淮秋日錦帆開江上芙蓉伴酒杯天府蜚英稱弱冠帝鄉  
作賦見雄才星隨使節南昌遠日計征途北斗迴歸到重陽  
無別眺仙郎高築讀書臺

送伍給事謫萬載丞

湯顯祖 臨川進士

年來清奏出陪京每向秋江送客行給事舊從關令尹爲丞



新失漢公卿星通百粵蠻差少地接長沙濕較輕自是世情  
能物色不妨黃綬去逢迎

瞻思堂集

張棟 邑人

空山風景遞晴陰孝子銜哀日夜臨想像音容儼若在痛思  
恩愛慕何深鳥啼花落非吾事物換星移獨此心幾度白雲  
空悵望低頭無語自沈吟

遊九仙宮

鮑紹湯 邑貢知縣

冉冉乘雲竟不還驚傳紫氣在人間稚川雞犬留丹室緱嶺  
笙簫度碧關一沼洪深春不斷千家隱見洞常開徜徉此地  
仙蹤杳玉蕊峯頭挹笑顏

前題

辛圖猷 邑人知縣

蓬萊宮闕寄塵寰鶴警蹁躑霄漢間寶殿瑞煙通玉殿竹闕  
紫氣出函關簫臺鳳去雲陰冷瑤樹風清月影閒一别千秋  
誰識面何須大藥駐朱顏

讀書莊嚴院偶成

辛圖猷

七寶何年奠此山青青翠柏藹禪關風霜不老仁王像歲月  
仍深古木顏藜火夜分僧入定茶煙朝起鶴飛還木蘭遺事  
皆陳跡莫放光陰白日閒

畢侯祠成

張紹渠 邑人

六載披星理僻鄉僅惟一水飲龍江買牛給種桑麻盛捐俸



空囊豆粥香化被綠林荆棘淨春融覺序李桃芳遮留借寇  
知難挽遺愛千秋寄召棠

康樂橋

張紹渠

兩岸青山擁石磯長橋跨水鎖江扉墩侵浪裏陽侯宅樓礙  
河邊織女機古柏烏棲啼夜月垂楊鶯語戀朝暉謝公祠外  
行人渡應望龍光拜袞衣

題畢侯冊頁

彭自新  
邑人按察

四邑花封此最衝賢侯冠蓋日從容政成大壑趨流易才擬  
千將出匣同苦節自甘惟飲水烹鮮有序見屠龍士民已荷  
中牟令姓字還看徹九重

康樂橋

劉芳譽

彩虹長卧碧灘頭傑閣凌虛四面秋古柏枝高巢鶴穩空江  
日落暮帆收千年夢草人何在一片浮煙水自流獨倚危闌  
傷往事白雲相對思悠悠

過謝公祠

劉芳譽

古廟幽沈瞰卓峯山雲長擁畫朦朧年深樹杪盤蘿薜地迴  
書臺長華蓬斷碣無文消古字乞靈有客扣晨鐘夕陽幾度  
明檐屋疑是仙來駕彩虹

康樂橋

鄧繼耀  
邑人

謝家春草賦江東此地津梁駟馬通百丈虹光亘地軸千層



萬壽縣志 卷二十九  
錦浪蹴天風帆歸小市官亭驛旛拂靈祠古柏叢煙路牛羊  
喧渡口迴瀾猶頌濟川功

自題雅人之居

喻懋敬

邑舉人

光中現影幻和真習靜觀空自不貧烏話天機明牖我花呈  
生意默提人倦來欹枕清無夢醉去揮毫妙入神燕處超然  
長自在風光不竭四時春

寓安德寺讀書次前人韻

龍玠

尋幽養學寓珠林畫掩重門春意深風遞水聲鳴碎玉日臨  
花影漏疏金菱荷展破寒潭碧山鳥啼酣綠樹陰講罷庭前  
閑眺望盡收好景入豪吟

策筮館有懷

譚嘉猷

邑人

自憐肺病未曾蘇且向深林獨據梧亂木風聲隨遠近空階  
草色自縈紆謾言五嶽真禪客仍是高陽舊酒徒縱使悠悠  
俱白眼寸心還與月同孤

中秋日偕友遊西庵

楊遇用

撫景秋中強笑顏聯鑣尋樂踏松關細聲樹杪風吟葉霽色  
窗前水映山蛩響寒階僧自定蘚留雲徑客常閒那知身世  
俱成幻一任鬢鬆鬢去斑

飲林家渡

張汝誠

小市臨江盡日幽偏宜酌酒對江流遊人眼醉春花媚賈客



萬華縣志卷二十九  
船來晚照收興擬濠梁還自放心同谷口亦何求孤城新月  
看看上更載清尊泛剡舟

輓龍德剛長史

長史  
劉本彝

玉樹經秋事已非臨風不覺淚頻揮一朝遺世心傾日百代  
留名血染衣雲暗楚天仙永逝月明華表鶴空歸鵲鶴原上  
飛鳴急讀罷應知儔侶稀

前題

沈葆  
吳興人

天命陰移事已非孤忠有淚向誰揮抗師豈爲全忠計就逮  
何辭濺血衣骨返龍江蛟欲吼氣浮紫蓋鶴來歸卽今日月  
還依舊惆悵先生絕調稀

前題

王國斌  
宜春

定論千秋有是非英雄血淚不須揮綱常大義堪維世忠孝  
餘馨尙襲衣介性豈思天意改游魂多逐月明歸稜稜生氣  
今猶烈不負君親宇宙稀

康樂風俗

邑令  
陶大邦  
會稽

瓦白家家似帶霜茅柴水酒徧村鄉士衣布褐雲鞵淺女插  
荆釵蟬鬢長五月稻梁登野圃三秋瓜果足山莊池魚宴客  
隨投網不似人間逐逐忙

題廣報觀悟元樓

韋明傑

西郊飛閣上千霄卓劍仙風奕世飄古木龍嵒環界繞羣峯



縹緲望中遙雲封石屋留丹鼎月滿空庭聽紫簫漫自登臨  
舒阮嘯泠然出谷恍遷喬

秋日入黎源

韋明傑

雄關天造楚江分景值秋高思入雲繞廡長流清見底環雲  
列嶂曠無垠那堪野老殷為主惟願山魃永息氛乘興遠來  
觀保障歸途漫賦夕陽暉

題紫雲庵

有引

韋明傑

癸酉秋日予入黎源所過皆崇山峻嶺鳥道盤旋因有穿雲  
轉石此身輕之句歸泊岐陽信宿即發不數里有紫雲庵結  
茆嶺上仰矚霄漢俯瞰溪流予散步入庵室僅如斗而行人  
小憩其中等於招提問僧此何地則云古荒阮是今俗改芳  
阮予笑謂僧云禪心入寂何分芳與荒諱荒為芳亦邊隅之  
見耳迤邐而下轉為十八洞其洞不可考則見古木交映寒

泉瀉流山光雲影間多磊砢危石令人應接不暇惜胸無山  
水者未免眼前錯過也因拈一律書以紀遊

登臨怪說古荒阮歷盡幽深思轉清泉瀉涓流鳴曲澗山迎  
朗旭照林明僧依嶺畔松為侶客躡雲根石送程得趣不知  
還上下紆迴險道履如平

慨慕黃竹關和嚴分宜韻

韋明傑

一片虛明自往還俯然飛上白雲間何年辟穀全遺世此地  
成丹雘掩關物外煙霞留竹韻壺中日月掛松閒塵勞千古  
誰能脫慨慕仙蹤祇汗顏

遊紫霄宮

王若棟

邑人

言尋郭外喜相招步入仙宮近紫霄影落空壇松色古寒生



高車縣志卷二十九  
深殿柏陰饒地偏迴覺塵緣斷心淨應知習氣銷倘得三花  
猶未落終期宗遠訪逍遙

前題

龍兆禎

邑貢  
知縣

危樓高倚碧雲霄爽氣朝來玉殿飄琅篆細參元覺近金經  
頓解悟非遙彩雲未散燒丹竈紫炁長流遶洞簫不盡登臨  
今古意還須世外訪王喬

前題

鄧文輝

邑人

高樓積翠矗層霄道氣仙風奕世飄滿殿煙霞丹竈古三峯  
福地紫微遙乘牛東度開金鑰跨鳳西飛品玉簫欲覓葛洪  
勾漏令緱山那得會王喬

高岡雅詠

張壽朋

人中巢許自衣冠不愛華軒愛考槃帝女瑤臺雙鳳起仙郎  
桂樹五枝攀青山雅足供棋局白日何須問羽翰況我八公  
招可致定將鴻寶授劉安

筆架山

馮其恆

綠滿平蕪石一拳微分數罅筆牀偏不從萬疊迴巒出獨與  
千秋泮水連山樹影臨毫散采江霞色映錦飛箋文匱再有  
松煙染指顧罍磯錦硯圓

春遊新庵

馮其恆

駐馬深山萬綠中鷓鴣啼處杜鵑紅石鳴春澗泉初急花隱



晴巖香暗通樵徑草深朝過雨僧房衣冷晚多風年來遊倦  
思肥遯徒倚禪關思不窮

贈別明經韓克忠

國朝 吳自肅

回首康城事已非獨憐知己共依依片帆江上因君佳尊酒  
舟中送我歸照眼桃花隨浪暖牽情楊柳正春肥論交自是  
文章久莫向東風怨落暉

課農

常維楨

長夏循行徧隴阡村村頻囑莫貪天晨須藿食趨田早晝勿  
松陰枕石偏月落記牽門外犢雨過休洩澗中泉課餘暫息  
垂楊下多少兒童聚馬前

暮春至康樂橋卽事

常維楨

勒馬孤村疎竹外溪流時帶落花輕幽林雨後雲知去野徑  
人過鹿未驚鳥送春歸聲切切風搖樹晚影橫橫杜鵑猶自  
啼深處似有依依不舍情

遊月臺禪院

常維楨

纍案盈函亦自清同人約步出孤城石苔巖下承趺坐山鳥  
林中雜梵聲雨過萬峯青鬢出香浮一院白雲輕年來撫字  
知無術爲愧河陽花不生

早秋勘荒宿新庵

常維楨

沿流投止見禪關修竹千竿屋數間僧向溪邊依石坐鳥從



谷口伴雲還低垂綠樹迷幽徑遍起紅霞繡暮山豈是閒遊  
恣信宿循行只爲惜民艱

贈義學汪生映極

常維楨

濂洛眞傳首豫章於君今日道重光席榮臬比非爲僭帳列  
笙歌未是狂分俸自慚山邑小從游敢托簿書忙喜看時雨  
均沾化漫道文翁守蜀疆

九日登月臺山有懷

汪映極

邑人

楓樹凝丹落葉忙飛飛細雨送輕涼山猿哭抱空枝瘦塞雁  
聲催野菊香世事堪愁愁不斷物情若夢夢偏長橫塘弱柳  
門前老那是當年醉客場

題石庵

郭遠

邑人

岩堯拾級上方通石屋天然色相空峭閣連雲蒼靄裏疏簾  
捲雨翠微中雉屏竹影迎棲鳳鶴蓋松陰隱落鴻好景牽懷  
情緒亂幾能飛鳥任飄蓬

遊石庵

宋希商

邑人

虛靈竅關境通元裏外穿雲別一天獻果猿歸青嶂裏咽泉  
蟬噪碧巖前虬松有意孤隨月疎竹無心密補煙門戶洞開  
諸品淨半栖雲鶴半栖禪

次郭遠同常父師遊天尖峯韻

宋希商

嶂峙尖峯勝玉林中藏古刹護濃陰樹雲山色一屏畫蕉雨



溪聲幾曲琴松落鳥啼煙帶遠日高僧話雨花深無邊好景  
難都覓且看先賢駐馬吟

重建文廟有感

宋希商

無端難發起西封到處干戈到處空百里燎原無吠犬一城  
積礫有哀鴻軍營未息烽煙警文廟誰傷草莽中幸際清廉  
常邑宰起衰振敝有成功

九日登靈鷲院訪僧

辛

剎邑貢生

九日尋僧到上方蒼顏白髮不尋常水流石澗龍歸鉢花轉  
清陰蝶繞廊數卷楞嚴消永晝一簾風月任徜徉攢眉欲效  
陶潛別衣袂飄飄風露涼

中秋日遊月臺山步韻

張汝梅邑人

臺閣凌霄帶霧開松風滿地拂塵埃遠山有意供青翠野鳥  
無心任去來長笛聲邀天外月疎林影送坐中杯雲籠半榻  
柴門靜那識上方儲駿才

步月南浦樓

何士傑邑人

一溪碧水靜無聲兩岸風蟬帶露鳴明月移秋雲入岫荒山  
傍晚鹿投城萋萋茅屋陰蘿掛寂寂柴門埜蔓生猶憶當年  
啼鳥處戎衣千騎佩刀行

登紫蓋尖

辛金振邑人

岩峩高聳碧雲寒覆蓋凝輪紫氣闌峯險盡如迴雁嶺溪流



不減釣魚灘日從海面天邊  
小雨過山腰頂上乾聞道仲初  
遺世處空留蘭若倚危巒

登康樂城晚眺

張日豫

城頭極目接秋空古木寒山盼不窮  
茅屋同居蕭瑟裏街衢  
總在寂寥中纔生秋月三江碧未了  
殘陽半壁紅雖然半菽  
炊煙少絃誦新聲有治功

遊丁田橋

張日豫

草色青青陌上深馬蹄帶露踏輕陰  
斷橋水港荒煙度古刹  
苔垣冷雨侵幾處犁鋤忙綠野數聲雞  
犬隔疎林隴頭試問  
春多少默默桃紅泛水心

丁田橋

龍上元 邑人

江天十里墜長蚪裘馬翩翩選勝游  
西落斜暉催客舫東凝  
曉露棹漁舟浮空樓閣星辰近遠檻  
峯巒霧靄收來往漫思  
前輩跡姚侯功德鎮千秋

前題

張列辰 邑人

流水遙穿郭裏來滔滔寒玉去無回  
長虹遠帶青山出傑閣  
高從碧漢開複道逶迤通駟馬游人  
絡繹動塵埃吟風古柏  
多清韻似問於今題柱才

憶遊石庵

宋希陳

曾度蠶叢入洞天磷磷澗石咽清泉  
不須巧匠揮斤斧自有



瓊花傍几筵古寺雲間橫古樹新篁風發擺新煙遠公一笑  
渾如昨何日重來問大還

暮春遊竹山洞

張鏊 邑貢訓導

怪石層崖護竹山洞門虛敞幾重關春深草蔓階長綠雨後  
苔錢地滿斑水冷雙溪沙畔古風香數樹碧桃閒從今得箇  
清幽趣欲識仙凡舉步間

宿翠巖亭

辛顥 邑舉人

翠巖深處上方家古木參差一徑斜石倚坐間生異草泉通  
竈下試新茶環池飛動含風閣到岸逶迤逐浪槎夜半聞鐘  
塵慮淨羣僧競起覓袈裟

都門春日雜憶麝腦山房五首 錄二

龍鳳祥 邑人知州

石室何人起大觀渠渠終古不勝寒嶺頭雲木霜根皴洞口  
茹亭月露溥久別名山憑夢到每思舊友取書看時名謝得  
從吾好金碧潭心把釣竿

橫截山腰開局面直撐洞口卓簷牙神斤鬼斧天人地穴處  
巖居伯仲家鵝嶺有田分鶴料龍潭無路透牛車珠崖翰墨  
清香水活火新烹蒙頂茶

筆架迴瀾

辛文彬

曾聞椽筆夢奇觀石架天然水際蟠色麗珊瑚光翰墨香滌  
芹藻襲衣冠璇源細織澄江練砥柱中分學海瀾長傍巖宮



華縣志 卷二十九  
標勝概何人文藻重詞壇

石筍凌空

辛文彬

霹靂何年裂石祺嶙峋巨筍迸厓中孤標不受風霜蝕終古  
還疑節目空玉版孰參真妙旨靈根長護藉神工莫誇解籜  
能成寶勁質羞儕集鳳桐

釣魚臺

盧爾洛  
邑廩生

山迴岸曲翠屏隈怪石江皋擁釣臺映碧潭空懸倒影瀕涯  
水落長新苔忘機跌坐朝還暮任意垂綸去復來髣髴富春  
漁隱地清時頻起涓濱才

桐溪灣

盧爾洛

涓涓一曲赴桐溪繞麓穿涯石壁西澗底游鱗時隱見巖前  
飛鳥倏高低小橋谷口灤洄抱長堰陂頭去住迷知有問津  
人未至碧梧看取鳳凰棲

龍龍山祠

辛燈元  
邑歲貢

大節當年孰可攀後人追號擬龍山秋風烈士相憑弔月夜  
忠魂自往還下邑專祠今特立東鄉議卹早相關袁山並峙  
同千古扶植綱常振懦頑

龍河晚渡

鄧斯沂  
邑舉人

夕陽斜映綠楊紅喚渡人來認短篷一棹水痕城郭外半江  
煙景畫圖中漁翁罷釣歸新浦騷客沽春醉晚風古寺鐘聲



東坡詩集卷二十九  
催月上匆忙影散各西東

筆架迴瀾

辛炳晟

浩蕩城心幾笏冠生花飛座尙泥蟠劇憐活水如清腑消得  
中書一免冠鸚鵡洲邊羞浪墨珊瑚架下賽文瀾迂生更有  
凌雲筆直擬簪從玉檢壇

龍河晚渡

辛炳晟

江干斜照豔丹楓滿目飛鴻繞樹重暝色十分臨近岸行蹤  
一樣鬪歸容寒煙馬腦山前棹深竹涼亭寺裏鐘送盡朝來  
城市客繫舟留渡水中龍

小嶺樵歌

辛炳晟

東臯薄暮白雲遙羣下危峯驀澗橋落日半肩人近市秋風  
一徑銜橫腰都將好夢忘占鹿誰學披裘笑敝貂穩有青山  
消不盡勞歌談道解憑超

石筍凌空

辛炳晟

何來斗絕奮奇峯踴躍龍山黑子中出地幾曾驚坼偏著鞭  
突欲碎虛空雷風咫尺猶難定袍笏商量總未工根到九泉  
終勝竹枚生浪說半生桐

龍江泛舟

辛啟泰

洲環錦水碧迢迢古渡人來唱六么畫裏江亭依晚照鏡中  
煙樹落長橋波含扇影魚還暖渚漾旗風檝自搖兩岸疎鐘



雲壑靜鳧鷗散處想清標

坤山夕照

邑令周澍錢塘

城闔西去見坤岡恰好郊行趁夕陽嶺外飛來孤鷺白山凹  
露出遠峯黃鹿柴鳥散煙初暝牛背人歸影倍長萬丈霞光  
烘晚景攜筇獨自立蒼茫

湯周雪霽

周澍

擬向湯周訪謫仙殘冬冰雪一年年難尋鴻爪留泥蹟又是  
鵝翎送鴈天洗盡塵埃歸大澤空色相悟前緣袁眠戴隱  
尋常事翹首清風獨悄然

涂泉八景

錄四

辛師雲

何人屹立金鼇頂手捧朱輪過海來山勢渾如虛閣迴日光  
恰向曉峯開珊枝髣髴凝烟樹火齊玲瓏嵌石臺漫向神山  
觀若木此間便是小蓬萊

浮樓曉日

清秋皓月照波心萬頃琉璃一鑑臨雙槩載將桃葉麗扁舟  
放入藕花深空明槎似浮銀漢皎潔身如在鏡林玉笛幾聲  
人遠近天風吹送廣寒吟

明月泛舟

蕭樓靜坐夜三更忽聽遙村杵回鳴秋水半塘煙欲暝寒空  
萬里月孤明敲砧詎擬征人怨相唱猶含樂歲聲白露滿庭  
人寂寂聽來逾覺道心清

村虛夜春

柔祇終古毓靈泉湧出明璣顆顆圓定有鮫人潛止水漫勞



象罔索深淵璿源激射光難定壁沼潑洞勢欲旋更喜又昌  
星夜照珠光相映徹中天 珠泉萬顆

五言絕句

登祝融峯

南唐李徵古 邑人

欲上祝融峯先登古石橋鑿開巖險處取路到丹青 采南唐近事補

記萬載風俗

宋蔣之奇

居民覆其屋大半施白瓦山際兩三家如經新雪下

官酷米爲麴釀出成紅酒里社醉豐年便是宜城酎

田中多峭石蒼玉亂欹斜怪似湘中見封域近長沙 舊志作謝謬詩

誤編爲五古一首又府志通志俱作祖無擇詩此從嘉定志

寓崇信寺宿僧如晉禪房

明推官陳輅 高要舉人

禪關留幾日風雨過西堂老衲渾無事頻來炷博香

漠漠山城暮秋深寒氣生江村煙雨裏遙望不勝情

廣報觀閒步

聞應期 邑舉人

百里山河外孤城雨雪中遷鶯猶未起應是待春風

過坤山

喻應魁 邑人

露冷蛩聲急雲寒雁影偏蕭疎滿目意斜日照山川

登龍河城樓

喻懋敬 邑舉人

谷竅風吹萬江天月印雙巍樓觀四達遠秀入虛牕

靜安寺

喻懋敬



月照殘燈後鐘鳴夢醒初虛堂無法說默坐契真如

翠巖寺

國朝魯鴻

古寺遙臨水招邀得此君梵聲與清磬疎冷入秋雲

六言絕句

龍河晚眺

魯鴻

芳樹落霞綺麗淡雲將雨清酣遙望海鴻歸去聲聞江北江

南

七言絕句

辭南平鍾王召

唐僧就章

摧殘枯木倚寒林幾度逢春不變心樵客見之猶不採郢人

何事苦搜尋

次萬載

宋蔣之奇

碧嶂千層附城出清江一條穿市飛聞說當年謝康樂雲間

雙屐去忘歸

萬載道中

阮闕知袁州府

謝家山下雁聲中道上逢僧問上功寺名漠漠雨絲千萬縷織

成煙素靄秋空采嘉定志補

萬載縣

阮闕

門橫路斷竹爲籬雪色漫漫瓦屋稀黃嶺青腰墟市罷盡沽

紅酒夕陽歸



寄題張氏中隱堂

鮑同

當年蚤有菟裘意歲晚塵埃尙困予聞說龍江真可隱欲將  
餘日寄仙居

問合知君困欲還才高那得卧家山由來甘井人爭汲卻恐  
心閒身未閒

采嘉定志補

題春風亭

王克勤

舊時康樂庭前地今日春風更揭堂堂上詩情仍對酒妙於  
草色映池塘

愛民盛意醇如酒閭里遙知絕歎愁只恐天邊爲翹手趣歸  
清廟薦黃流

采嘉定志補

訪龍長史不遇

明郭鈺

鸚鵡窗深鎖翠寒松花不掃紫苔乾自將名姓題修竹延桂  
樓前第五竿

坤山夕照

吳節

縣西有路過坤岡荆楚雲山入渺茫行客不須憂日暮幾枝  
高柳掛斜陽

筆架迴瀾

吳節

巨石崔嵬架筆鋒千年長對素王宮試向雙虹橋上望詞源  
倒挽盡回東

龍河晚渡

黃恭



清溪一曲抱龍江沙際舟橫水渺茫隔岸行人遙喚渡歸心  
斷絕日昏黃

翠巖四時歌

曾夢祺

知州

誅茆結屋枕龍江鈎引春光到小堂獨立東風塵夢醒杖頭  
時帶落花香

博山添火裊沈煙石枕藤牀午夢便棋子一聲山鳥去翠巖  
偏覺日如年

巖桂浮香襲短袍黃花綠酒薦霜螯梧桐未老孫枝秀拭目  
清霄有鳳毛

翠巖高聳玉峯寒人在冰壺眼界寬閒傍梅簷索春意未春

時節正宜看

漢源嶺莊

喻應魁

金鷲玉鷲綴青林水曲峯迴路轉深樵牧放歌花氣馥雲中

雞犬武陵陰

靜安寺

鄭邦德

繚繞迴廊通碧殿密蒙繁樹蓋山軒白雲滿地無人到雨打

松花落寺門

遊丁田作

宋良翰

邑人  
通判

得意尋春曲徑賒山間好鳥和鳴蛙登虹疑是蓬萊窟收得

春風兩袖花



瞻思堂

歐陽材

重來廬墓倚斜暉雲鎖松楸欲掩扉  
一自蓼莪詩廢後有誰更舞老萊衣

過如是庵

袁汝祝邑舉人

如來世界自清涼白晝談禪未覺長  
袂破個中無隱義木樨滿院放秋香

釣魚臺在潭頭

潘璧邑人

蘆白沙明宿鶯飛桐江蟠水隱淪希  
一絲九鼎千鈞重謾向漁人話此機

水天別業

張汝誠

小築江皋架滿書水天澄澈浸吾廬  
晝長倦欲停披卷起見忘機鳶與魚

獅巖

劉芳譽

獅踞巖空蹟尙留書巖人去幾春秋  
世閒事物消磨盡惟有寒灣長對流

百巖作

張藥

石田茅屋野人家百番春風換歲華  
盡道長生緣辟穀不知香飯有胡麻

龍山晚眺

國朝常維楨

小小孤城不斷雲蒼山止處碧流分  
晚煙初起迷村樹漸有



樵歌送夕照

清泉山小憩

常維楨

樹密鳥飛人不見  
杜鵑啼散暮春花  
隔林竹影搖溪水  
靜繞

山村一一家

登紫蓋峯

辛 礪

偶上龍山第一峯  
禪關時有白雲封  
高人身在蓮花府  
隔斷

煙嵐數十重

龍河晚渡

辛 礪

龍江城下水如梭  
尊酒論文幾度過  
無限風光波浪裏  
綠楊

隱隱起漁歌

雲峯道中

宋希商

盛夏炎蒸按轡回  
雲峯迎我入雲隈  
無端風雨前村過  
刺有

餘涼馬上來

采府志

竹山洞

張 鑿

洞門虛敞幾重關  
怪石玲瓏水竹間  
滿地白雲春雨後  
風香

數樹碧桃開

采府志

觀音洞

錢志遙

情懷半取未曾開  
此日公餘選勝來  
不是相逢賢處士  
怎能

塵跡印蒼苔

問津先許叩柴關  
主客相攜一往還  
何日拂衣塵事了  
洞邊



分與屋三間 宋引玉集

前題

吳游

螺旋一逕傍巖開可似青蓮托跡來長得此身觀自在落花紅雨滿蒼苔

洞口柴門不掩關採芝人去暮方還此中迴有仙凡別相望

盈盈一水間 宋引玉集

夏日過月臺山寺

魯鴻

康樂風流蹟已陳卅年手澤尙重新 寺有先太父通政公題額 老僧未解

沈吟意翠竹蒼松是故人

萬載山中追和同年辛景淳題壁韻

府教 熊日華 新建進士

風高鶴嶺羽書遲飲馬巖城欲暮時十八渡頭飛鳥盡一緘

冰雪故人詩

庚辰秋仲遊上鄉各山

李榮陞

二龍行廟在昌田羽士無聞像就湮畢竟僧家憑藉得誰云

神力怯安禪 昌田廟

有元鄉校盛江南下里生徒鹿嶽叅辛苦榮甥恢廟器祇今

無路覓張巖 獲富

九州望祀各名山古往今來瞬息間尊甚秦皇秦記確無人

引義繕遺壇 秦皇山

晉世名流蹟可思襄陽建業往來疲彥威於此留貽厥蕪沒



正議不磨萬古傳正峯不缺一錐圓卓哉此筆尼山投漢晉

春秋綱目先 卓筆尖

拾逕就荒高脊平闊無人跡草綿生九龍長是貪雲霧漏出

金盆日脚明 九龍山

東面天梯不假攀身騰鼇背俯人寰剛風又迫南寮去徑熟

無憂行地難 王皮尖

過黃田庵懷僧子山

李榮陞

盼睐青巖引步遲嫩松披偃逕叅差庵前桐樹宛相笑憶爾

涼衫匝繞時

同穿霧雨半天行銀海遙連足底平轉過山腰雲似鶴凌空

還讓錫飛輕 風門凹

聚石峯巔萬法身祖師借力牧童勤高天雷輓徹根盡拍手

遊僧更不噴 煉魔場

飄零湖海夢重回泉谷生疎興未灰心洞暫教燃漆去髻峯

還擬挂冠來

重過樂阮庵有感

辛文彬

細石蒼苔曲逕穿禪林重到記前緣道傍塔影清陰匝曾倚

琅玕聽暮蟬

寂寂回廊鐘磬稀登堂疑是復疑非綠何十畝開金地換作



田家白版扉

寶巖寺訪慧遠上人遇

辛啟泰

樹杪山橋十里程  
綠扶緘草午風輕  
寒巖欲莫空山落  
獨倚長筇聽鳥鳴

詩餘

煙雨觀

水調歌頭

宋縣丞 趙師俠

江流清淺外山色有無中  
平田坡岸迴曲一目望難窮  
波面輕鷗容與沙際野航橫  
渡不信畫圖工路入神仙宅  
翠鎖梵王宮  
俯晴郊增勝概氣橫空  
雲林城市層列知有幾重重  
更上危亭高處徙倚闌干  
虛做象緯逼璇穹要盡無邊景煙

雨看空濛

宋陳府志



萬載縣志著志卷二十

雜記

應智頊之起以武畧保聚鄉里初疑爲閭左豪右彪勇任俠之徒及觀於其州人生則戴爲父母沒則奉之爲神則又歎其功德所被必由其有豈弟之意溫溫煦煦以拊循其民而無幾微麤猛嚴厲之氣斯所以沒世不忘也謂之循吏抑何媿焉

王謨十代文獻畧

唐僖宗文德元年秋八月楊行密畏孫儒之逼欲輕兵襲洪州

通鑑綱目

袁襲曰鍾傳定江西已久兵強食足未易圖也

自廣明庚子之亂天下大荒車駕再幸岐梁道殣相望郡國率



不以貢士爲意江西鍾傳令公起於義聚奄有疆土充庭述職爲諸侯表式乃莘莘以薦賢爲急務雖州里白丁片言隻字求貢於有司者莫不盡禮接之至於考試之辰設會供帳甲於治平行鄉飲之禮常率賓佐臨視拳拳然有喜色復大會以餞之筐篚之外率皆資以桂玉解元三十萬解副二十萬海送皆不減十萬垂三十載此志未嘗稍怠時舉子有以公卿關節不遠千里求首薦者歲嘗不下數輩

唐撫言

安陸郡有處士姓馬忘其各少遊湖湘又客於鍾陵十數年嘗說江西鍾傳本豫章人少倜儻以勇毅聞於鄉里不事農桑恒好射獵熊鹿野獸遇之者無不獲焉一日有親屬酒食相

會傳素能飲是日大醉唯一小僕侍行比暮方歸去家方二三里谿谷深邃有虎黑文青質額毛圓白眈眈然白中林而出百步之外顧望前來僕夫見而股栗謂傳曰速登大樹以逃生命傳時酒力方盛膽氣彌麤卽以僕人所持白梃山立而拒之虎卽直搏傳傳亦左右跳躍揮杖擊之虎又俯伏傳亦蹲踞須臾復相挐攫如此者數四虎之前足搭傳之肩傳卽以兩手抱虎之項良久虎之勢無以用其爪牙傳之勇無以展其心計兩相擊據而僕夫但號呼於其側其家人怪曰晏未歸仗劍而迎之及見相捍卽揮刃前斫虎腰旣折傳乃免焉數歲後江南擾亂羣盜四集傳以鬪虎之名爲眾所服



推爲酋長竟登戎帥之任節制鍾陵鎮撫一方澄清六郡唐  
僖昭之代名振江西官至中書令

耳目記

鍾傳鎮江西日客有以覆射之法求謁傳以歷日包一橘置袖  
中令射客云太歲當頭坐諸神莫敢當其中有一物常帶洞  
庭香

鄭文寶南唐近事

上藍和尚在洪州甚爲鍾傳敬禮疾篤傳省之求一言相付和  
尙起索筆作偈以授其末云但看來年二三月柳條堪作打  
鐘鏗明年春淮帥引兵奄至洪州果陷江南遂爲楊氏所有

全唐詩話

梁太祖乾化時諸州長吏多武士專以軍旅爲務不恤民事知

誥獨選用廉吏修明政教招延四方士大夫洪州進士宋齊  
邱好縱橫之術謁知誥知誥奇之辟爲推官與判官王令謀  
參軍王翊專主謀議以牙吏馬仁裕曹悰爲腹心

通鑑綱目

吳順義中差官與販簿定租稅厥田上上者每一頃稅錢二貫  
一百文中田一頃稅錢一貫八百下田一頃千五百皆足陌  
見錢如見錢不足許依市價折以金銀并計丁口調課亦科  
錢宋齊邱時爲員外郎上策乞虛抬時價而折絹絹綿本色  
曰江淮之地唐季以來戰爭之所今兵革乍息黎昨始安而  
必率以見錢折以金銀此非民耕鑿可得必興販以求之是  
爲教民棄本逐末耳是時絹每疋市價五百文綢六百文綿



每兩十五文齊邱請絹每疋拾爲一貫七百縑爲二貫四百  
縑爲四十文皆足錢丁口課調亦請蠲除朝議喧然沮之謂  
虧損官錢萬數不少齊邱致書於徐知誥曰明公總百官理  
大國督民見錢與金銀所謂擁籌救火撓水求清欲火滅水  
清可得乎知誥得書曰此勸農上策也卽行之自是不十年  
間野無閒田桑無隙地自吳變唐自唐歸宋民到於今受其  
賜齊邱之事美矣徐知誥乃亟聽而行之可謂賢輔相而九  
國志齊邱傳中畧不書資治通鑑亦佚此事今之君子惟知  
浚民以益利豈不有覲於偏閭之臣乎

容齋隨筆

世言江南精兵十萬而長江天塹可當十萬國老宋齊邱機變

如神可當十萬

說見龍象  
江南野錄

周世宗欲取江南故齊邱以反間

死方五代之際天下分裂大亂賢人君子皆自引於深山大  
澤之間以不仕爲得而馮道有重名於中原齊邱擅眾譽於  
江表觀其人可以知其時之治亂矣周師之犯淮南齊邱實  
預議論雖元宗不盡用然使展盡其籌策亦非能決勝保境  
者且世宗豈畏齊邱機變而間之者哉蓋鍾謨自周歸力排  
齊邱殺之故其黨附會爲此說非其實也予論序齊邱事盡  
黜當時愛憎之論而錄其實覽者得詳焉

陸游南唐書

宋齊邱相江南李先主昇中主璟二世皆爲僕射璟愛其才一  
日選景於華林廣席獻羯鼓詩曰巧斲牙牀鏤紫金最宜平



穩玉槽深因逢淑景開佳宴爲出花奴奏雅音掌底輕瓊孤  
鵲噪枝頭乾快亂蟬吟開元天子會如此今日將軍好用心  
又嘗獻鳳凰臺詩曰嵯峨壓洪泉峯峇撐碧落關哉秦始皇  
不驅亦不鑿上有布政臺八顧背城郭山感龍虎健水黑螭  
蜃作白虹欲吞人赤驥相焯爍畫棟泥金碧石路盤磽确倒  
掛哭月猿危立思天鶴鑿池養蛟龍栽松棲鸞鷲梁間燕教  
雛石鱗虵懸殼養花如養賢去草如去惡日晚巖城鼓風來  
蕭寺鐸掃地驅塵埃翦蒿除烏雀金桃帶葉摘綠李和衣嚼  
貞竹無盛衰媚柳先搖落塵飛景陽井草舍臨春閣芙蓉如  
佳人迴首似調謔當軒有直道無人肯駐腳夜半鼠窸窣天  
陰鬼敲啄松孤不易立石醜難安著自憐啄木鳥去蠹終不  
錯曉風吹梧桐樹頭鳴噪噪我我江令石青苔何淡薄不語  
興亡事舉首思渺邈吁哉禾到此褊劣間尺蠖籠鶴羨鳧毛  
猛虎愛蝸角一日賢太守與我觀橐籥往往獨自語天帝相  
唯諾風雲偶不來寔字銷一畧我欲烹長鯨四海爲鼎鑊我  
欲取大鵬天地爲燔燉安得生羽翰雄飛上寥廓馬令南唐  
書宋齊邱本傳

朱瑾旣殺知訓自剄即日其事聞於昇州知誥齊邱曰請明公  
卽今渡江定其事仍馳聞令公則政事之任歸公矣不然令  
公當以諸子入代明公無望矣知誥立從之溫聞知誥已入



遂因而許之 五國故事

宋齊邱出鎮洪州詔賜錦袍烈祖親爲衣之李建勳贈詩有一人看上馬雙節引還鄉之句時論榮之齊邱至青陽初令穴牆給食俄又絕之餒者數日中使謂齊邱曰俟令公捐館方供食耳以絮塞其口遂卒時有黑氣起直貫九華山元宗暮年禁中往往見齊邱陳覺李徵古如生時禳之不去甚惡之因議南幸 江南餘載

李徵古少時賤遊嘗宿同郡潘長史家是夜潘妻夢門前有儀注鞍馬擁劔骨朶衙隊約二百人或坐或立且云太守在此洎見乃寓宿秀才覺後言於潘曰此客非常人也妾來晨畧

見餞酒一鍾贈之金扼腕曰郎君他日富貴慎勿相忘李不自知也來年至京一舉成名不二十年除袁州刺史離闕日

元宗賜內庫酒二百瓶 鄭文寶南唐近事

徐楚金端人也其爲徵古作記稱以吾師意其學行在當時亦非碌碌者徒以比周陳覺傅會齊邱遂至目爲僉邪爲世嫉憎則甚矣朋黨之累人也班固之於竇憲也馬融之於梁冀也陸機潘岳之於賈謐也柳宗元劉禹錫之於王叔文也其人文章經濟豈不足以自致功名而立身一敗萬事瓦裂殷鑒不遠自古而然夫防風侏儒各有一節執其一節即可定其身之長短然而相士者於此又有截長補短之法焉徵古



人品不必深論至以經術潤色吏治亦不可謂非其所長予  
故不取南唐書而別采他籍以入於循吏傳斯亦瑕瑜不掩  
之意也 王謨十代文獻畧 按記中敘述吾師語似指孔子

宋太祖欲伐江南萬載徐鉉入奏乞罷兵太祖曰江南主有何  
罪但卧榻之側豈容他人鼾睡乎 周深坡長編鈔

徐常侍入汴市一宅居後見宅主貧甚曰得非市宅虧價而至  
是耶吾近撰碑文獲潤筆二百千可以相濟其人亟辭亟命  
左右輦致之其厚德如此 老學叢談

萬載徐鉉寓邠州死家人挈喪歸道出一邑時索細爲宰忽一  
官自稱江南放叟徐鉉來謁曰僕有所懇平生本廉介向在

江南爲學士時嘗勉強徇情誤受人一寶帶不獲固辭爲囑  
執政更定一獄雖事不枉法情有可原然或不免貪財罔上  
之罪今旅魂過海神廟下恐不及徧察生平緣此案不相容  
君爲邑宰統隸版籍乞爲吾謝之言訖不見細異其事乃爲  
請禱柩過如飛云 黃東重航中帆

徐鉉爲人忠厚不以位貌驕人在海州時蒯亮爲錄事參軍鉉  
與往還如僚友有印粲者獻詩曰不將才業暫時誇人仰聲  
名遍海涯月滿朝衣聽禁漏更闌分直掃宮花諫書未上先  
焚稿御筆曾傳立草麻見說下朝無一事小池栽葦學僧家  
徐鍇撰義門陳氏書堂記有男女長幼以屬會之辭旣已授之



又密令寫碑人自於末添一食字或問故曰非食無以義聚  
欲以此一字爲陳氏子孫之誡耳

徐錯以屯田郎中知制誥久次當遷中書舍人游簡言每抑之  
錯遂詣簡言簡言從容曰以君才地何止舍人但兄弟並居  
清要物忌太甚請少緩之使衆稱淹恤進固未晚錯頗快快  
簡言徐出妓佐酒疊唱歌辭皆錯所製錯乃大喜起謝歸告  
兄鉉鉉曰汝乃爲數闕歌換中書舍人耶

江南餘載

潞水出豫章康樂縣其間烏程鄉有酒官取水爲酒極甘美與  
湘東鄴湖酒年常獻之世稱鄴潞酒

盛宏之荊州記

葉夢鼎字鎮之淳祐年知袁州言袁郡山多田少請特免租糶

轉運復下米三萬力請罷之毀萬載旗箭村淫祠塞其妖井  
宋史

龍鐔以國子監生超擢爲浙江按察使同時如阮友章爲福建

按察使王平爲北平又爲左右參政二十五人一時銓補豈

空印事發耶

夔州別集

岱源過講鄉者相傳十二真君講道經於是因名其鄉而立祠  
焉後燬正統間虎出爲患歲仍禳李孟友於舊址建真君壇  
虎他徙崇禱輒應居民德之并祀孟友於壇

本舊志

彭汪所居鄰家失火汪前夕夢一紅臉人以金尺量各屋簷至  
汪宅謂其僕從曰此善人也免之後火發被焚者數十家汪



宅獨存 舊志

前明間有屠沽晨逾山凹見虎蹲立援樹避之凹前一婦抱孩至鞭帶解乃置孩虎背結韉復抱下凹虎去問之曰石也知爲彭姓寡婦因奇而娶之延師課其子後家中落愠甚時村有富者入市過古廟聞廟中語曰今日彭老爺來此受責矣入廟闐然疑之立於市適屠偕子行屈指格之子號泣詰其故曰此彭氏兒也吾錢已盡索紙筆無已時富者曰母余代之自是讀書十餘年皆富者力後由舉人官二千石 本府志子抵上高十日後 順治乙酉十二月也 萬載署令杜之子杜子衿從省來求子撥兵護送往萬載收父骸予如所請具優卹金六兩同

牌給之杜抵萬載得父骸棺斂以舟載回因擄掠萬載良家婦女二十餘匿舟內度上高袁州刑館二役知而稟予予曰有處杜見予謝卹予曰尊翁在袁同事誼屬同寅當親弔發票示橋子杜船毋得擅放旋具二金折弔儀詣杜舟哭杜禮畢袁二役稟予云云指南岸一小舟曰在彼予命移舟親閱婦女見予俱大哭求救命予謂求父遺骸孝子也擄掠婦女則寇矣不可遂命小舟泊南岸其婦女一一停予寓所內具飲食款之次日卽命小舟計口授糧造冊付袁二役押回萬載取領各歸其家 黃鼎彝蕩平附記

舊志載康熙十七年諸生呈請科舉盤費邑侯吳克庵批云寶



與盛典往例自當舉行况本縣作養爲心期望尤切除照舊  
例外更當竭力破格以備諸生資斧二十年又值賓興則常  
白山實爲宰除祖餞撥船外每名餽贖四兩府縣學舉首倍  
之二公皆廉吏也且適當瘡痍未復官私交困之時而培植  
殷殷如是後之有心造士者可以勸矣舊志錄之有旨哉  
李元運翠園以善書名嘗游省垣與居停至肆閱書畫俱不屑  
意最後出一幅輒擲還之致口角復取而碎之肆主大譁居  
停許償金不可必欲得原書元運笑曰易耳索帟疾書數幅  
乃知所碎故其筆也

古漏壺需人守候黃茅周許仙自運巧思製錫壺三上高源壺  
次均漏壺又次昇潮壺又設過水瓶定水壺分水引水龍俱  
用錫製最下置一瓦盆爲迴龍池定水壺側縣小鐘鐘下有  
槌有車輪若水碓然昇潮壺內植木爲漏箭標十二時塑一  
小童捧之下安箭舟先審定時刻較準昇潮壺中漏箭將水  
注高源壺令滿徐徐自流以次遞下每交初刻及正刻定水  
壺滿自行傾洩車轉鐘鳴潮亦隨昇小童捧箭並起迄箭盡  
水盈壺下小孔旋流轉引水龍中洩入迴龍池潮水漸退箭  
舟亦漸低其上漏水仍微流不息漸積漸滿箭仍漸長如初  
每日僅從迴龍池運水高源壺一次

吾邑二百年來縣署十房並以清白土著承充相約不引客籍



以杜弊端不保任差役子孫以清流品雖重利不爲動其堅  
明約束即學校中有不及者近更多用儒童時見錄於學使  
彼身列士流考試保冒籍議敘授阜裔能無愧哉

原跋

右新纂志乘三十卷蓋邑侯衛松甫楊肖巖兩先生屬經借

同志輯而成之也邑之有志爲一邑公論所由定卽後世公  
論所由定成於一手實難集眾手爲之苟或依違涉私公論  
曷定哉斯志之輯就舊志所存者修其蕪而歸於簡明飾其  
俚而加之潤色其他生傳瑣事譜序壽詩輓章諸以失檢貽  
譏者概從芟易舊志舛錯者取証史書亡軼者蒐宋嘉定等  
志及直省各通志先正諸集補綴之要其論之所定悉以程  
中丞刊發章程爲準式存乎其公詎能徇乎人之喜厭非  
與分輯諸公有所矯異於其間也誠不敢沒一邑公論以存



後世公論而已後之博雅君子覆脉舊志諦審斯志當必有  
共諒此衷而仍存公論者不無厚望焉道光十二年秋七月  
邑人郭大經跋



易邑志為土著創也曷為以增訂原編言名創而實  
因不敢攘善也先是癸未甲申間邑先達郭星嶠先  
生應聘修志遐引旁徵裁以程式整嚴博瞻視昔之  
冗濫而多遺者不但過之惜衆論不一傳者寥寥幾  
為名山秘藏矣然其補疏漏訂舛訛既有光前乘又  
自雍正後志曠不修經羣力上下蒐羅俾九十餘年  
人文故實粲然著明以為後來者憑藉功尤不容沒  
奈何因細故掩全美乎雲念此久思與賢士大夫商



訂畫一期可通行而未得其會客歲大中丞吳公擬  
修通志徵乘各屬劉象九明府奉檄集議僉以新舊  
兩志為疑而屬雲總其成夫弁陋如雲何敢言志哉  
顧念傳述易於創作遠溯不如近徵郭先生原編具  
在稍加釐正增輯事半功倍即可應命因諭先生子  
海門明經海門欣然出以相示諸事和衷期歸妥善  
雲方喜海門不膠俗見可謂善繼善述而同事諸君  
亦皆合心并力踴躍趨公若以鄙見為不謬者豈非

先生之書應時而顯之一會耶不圖客籍自分畛域  
珥筆為能屈意調停反遭疊控不得已呈明分修兩  
不相謀以杜爭端此土著志所由名也然名雖別而  
實則一凡本籍事宜壹以原編為底本眾欲乙者乙  
之眾欲補者補之眾欲續者續之意所未安時復盡  
愚事增文省篇帙略相當非敢謂有功先生亦庶幾  
千慮一得使先生廣蒐文獻之深心不因細故而晦  
而雲亦得附青雲而顯也韓子云莫為之前雖美弗



高車縣志卷之二  
彰莫為之後雖盛不傳豈雲與先生之謂夫道光已  
酉季夏邑人辛辰雲謹跋

